

劉太傅藏春集序

易曰觀乎天文以察時變觀乎人文以化成天下大哉  
文乎在天為日月之著明雲漢之昭回星辰之錯綜在  
人為三綱五常之道禮樂政刑之方典章法度之美文  
乎文乎章句云乎哉太傅文貞公學參天人思周變通  
早慕空寂脫棄世務一旦遭際聖主運應風雲契同魚  
水有若偕侯規畫以興漢業召公相宅以營都邑叔孫  
奉常綿蕤以定朝儀陸賈詩書之語賈生仁義之說當  
雲霾草昧之世天開地闢贊成文明之治其謚日文不  
亦宜乎至於栽雲鏤月之章陽春白雪之曲在公乃為  
餘事公歿後十有四年是集始行於世夫人竇氏暨其



子璋及翰林待制王之綱求為敘引晚生愚陋誠不足  
知公萬一姑以時論所同然者附諸編末云至元丁亥  
四月初吉翰林學士太中大夫知制誥同修國史閣復  
序



劉太傅藏春集卷第一

七言律詩

溪山晚興

楚山臨水適幽情無意成詩詩自成  
秋雨滴殘秋草暗晚雲收盡晚風清  
漁舟散去橫煙靄樵擔歸來踏月明  
是樹有枝堪架足南飛烏鵲莫多驚

帳中

四句已過五句數疑際青絲間白絲  
萬慮困心成底事一閑安分在何時  
自知量小難禁酒人笑才疎強賦詩  
愜意數篇真可老採殘百草得靈芝

間中



兩字功名千萬峯紅塵遮斷海西東碧梧直幹終棲鳳  
綠竹虚心盡化龍明處細曾推物理昧時都錯怨天公  
年來頗得閒中樂世路區區夢也慵

讀遺古詩

人沒詩存重與看芳馨老幹比芝蘭生前富貴雖由命  
身後文章足可觀蜀錦絲頭從此細巴歌韻脚自来寬  
未憐郢曲無人和傳者幾希作者難

小齋

小齋香火結間緣鍾鼎山林各自天世事省來都合道  
塵心消去不須禪一庭夜發青春裏七字詩成白酒邊  
醉倒未嘗知早晚客來長怪日高眠

齋中

芝蘭玉樹映風前白石清泉翠靄邊照世聖經明似鏡  
通方古道直如絃立心無罔蓋當爾處事有成皆偶然  
求彼不如求在我一檠燈火對殘編

蝸舍間適三首

今古無窮歲月流山林鼎篆自悠悠意還本分易為足  
事不自然難免憂奪得鳳池終犯手構成蝸舍且抽頭  
南窓盡日消閒在細聽華公說四休

其二

盡戟朱門將相家山間一室息紛譁素食得飽那思食  
薄酒消愁宛勝茶就裏靜為真受用到頭間是好生涯

此身久置功名外萬戶封侯任彼誇

其三

半世勞生天地間千金易得一安難  
庭前松菊成間趣軒外雲山得卧看  
光滿此宵逢好月香來何處有幽蘭  
橫琴消盡塵中慮一曲秋風對月彈

嘗雲芝茶

鐵色皺皮帶老霜含英咀美入詩腸  
舌根未得天真味鼻管先通聖妙香  
海上精華難品第江南木葉屬尋常  
待將膚湊浸微汗毛骨生風六月涼

試高麗茶

含味芳英久始真咀迴微澀得甘津  
萃成海上三峯秀奪得江南百苑春  
香襲芝蘭關竅氣清揮冰雪爽精神  
平生塵慮消融後餘韻駸駸正可人

江邊望

沙白江清返照紅滄波老樹動秋風  
天光與水渾相似山面如人了不同  
千古周郎餘事業一時曹掾謾英雄  
東南幾許繁華地長在元戎指畫中

醉後

清明天氣賞花時桃李風前酒一卮  
夢獨不成春草句閒多記得古人詩  
倦將碎事然心火矢被虛名惱鬢絲  
惟有醉鄉同大化從他物理自參差

讀諸葛傳

賢聖隨時出處同道存元不計窮通一番天地鴻蒙後  
千載君臣草昧中玄德必咨當世事孔明良有古人風  
長才自獻成何用三顧還酬莫大功

讀書

畫餅功名抵死圖何如閒散得看書衣冠三代凋零後  
經傳一秦灰燼餘梧葉打窓秋院靜松梢轉月夜窓虛  
又開黃卷青燈下坐進人間駟馬車

醉中作

塵客俗狀走風埃鍾鼎山林事兩乖千古興亡歸恍惚  
一身行止懶編排無才濟世當緘口有酒盈樽且放懷  
何日還山尋舊隱瘦筇偏稱著芒鞋

秋懷

昨夜西風撼綠荷芙蓉凋盡奈秋何歸心又落鴻賓後  
別緒還隨夜雨多客氣有時難制伏官身無事亦蹉跎  
近來只賴杯中物醉倒半歌方浩歌

堤畔二首

金沙堤畔柳絲垂燕往鶯遷蜂蝶隨爛熳一春花發早  
飄零萬里雁歸遲閒來於物無相礙行處隨時多背馳  
幾樹野桃開未了東風無力賴誰吹  
穿林涉水陟崔嵬塞北雲南轉手迴詩句謾隨秋  
夢魂長被鼓聲催蝸房小小權書舍馬鬣清清當酒杯  
門外衆人忙似火几前孤坐冷如灰

夢覺偶成

秋菊春蘭醉眼中紛紛紅碧不堪窮  
鄭玄李白從玄白馬異盧同果異  
豈有功名歸鑒子枉將文字困英雄  
鳥聲喚覺南窓夢撲簌槐花墮晚風

嶺北道中

兩霽烟輕鎖翠嵐五更殘月照征驂  
王戈定指何方去天意仍教我輩參  
伯氣堂堂在西北長庚朗朗照東南  
江山如舊年年換誰把功名入笑談

行中

一夜輕霜塞草愁關山慘淡又成秋  
西飛白日繩難繫東去黃河海自收  
節序催人無處避生涯隨分不須求  
長歌短詠行程裏心逸身忙百事休

慚愧

紫庭仙客駕飛鸞多少雲霄着眼看  
靖節梁書於世淡元龍湖海為誰寬  
小詩吟罷仍須和長鋏歸來不必彈  
門外紅塵數千丈宮廬慚愧一年安

守常二首

得失紛紛不必窮一鳴一息古今同  
韓侯假印元無命李廣祈封未有功  
世事百年魂夢裏人生幾日笑談中  
朝三暮四相狙戲識破從前賦芋翁

熏天富貴等浮雲流水年光夢裏身  
但着眼觀皆外物不開口笑是癡人  
歌臺買酒閒消日醉帽簪花老弄春

燕燕鶯鶯莫相戲渠應未識此心真

論文

山前春色夢中殘鏡裏秋霜鬢際繁處世美人能辦事  
論文愧我未忘言蒼梧雲氣時時變赤壁波濤日日翻  
誰解立心如砥柱百端衝激只依元

春晚還山

人生無計免風埃漠北江南雁往來萬木何曾秋未老  
百花爭向暖俱開未能乞食尋歌院要想遊山到嘯臺  
明月滿庭閒杖履翠烟惹徧綠紋苔

秋夜

讀詩懷古掩重局上世滔風在典型儀鳳作謔猶有道  
感麟絕筆再無經明星墮地曾為石腐草逢秋也化螢  
殿閣參橫月斜落夜寒書舍一燈青

山家

翠微深崦遯肥家占斷安閒閱物華不但愛詩仍愛酒  
何妨栽竹更栽花固知天命原無間還信人生各有涯  
華屋山邱都是夢且圖沈醉卧煙霞

春閒遣興

自任張衡說四愁不令一點上眉頭是非海裏有何論  
名利場中無所求掃睡擬將茶作筭釣詩須着酒為鉤  
春風吹綠山前草盡日携壺勝處遊

閒况四首



車馬長安蕩路塵商山一曲紫芝新林泉誰伴隱君子  
雲月自歸閒主人蝴蝶日長莊叟夢鴛鴦沙暖杜陵春  
汨羅江上獨醒客空感秋風撼白蘋

一理未明常曖昧七情能節自冲和孟軻求已行時簡  
顏子心齋樂處多修禊水邊羣客會舞雩風裏一僧歌  
沙汀日暖春烟淡無數閒鷗沒浩波

閒中日月讀書舍醉裏乾坤沽酒樓金滿千簾遺子患  
官高一品替人愁安身道理行須記隨分生涯過即休  
看取飄飄無繫纜烟波江上一虛舟

山有嵐光水有聲得閒便是大功名彼長自覺此為短  
我重未知人所輕幾樹好花風乍靜一鉤新月雨初晴

此心只合長無事莫為人寵辱驚

秋夜飲

葉打銀牀謝井梧芰荷池沼半成枯青山阻興長千里  
白酒消愁只一壺日暮西風吹過雁夜涼明月照鷺鳥  
黃花離落秋香裏醉倒淵明不要扶

自然

名利場中散誕仙只將吟樂度流年酒逢知己心方醉  
詩到收功意更圓碧水悠悠入東海白雲曳曳上青天  
但能直往無疑滯不自然時也自然

漫興

春風吹入客中懷滯氣愁眉總散開誰慕蘭馨將作佩

自慚樗散不成材詩吟百首興猶在酒飲兩杯春已來  
累土豈如平地穩當年浪築九層臺

醒來

尺蠖微蟲解屈伸人生何用兩眉顰前前後後都為夢  
是是非非總未真已幸有書消永日豈愁無酒度芳春  
東風院落花梢上午醉醒來月色新

客散

南山秋色氣相高肥馬輕裘盡俊豪載笑載譎誰得意  
相趨相奉總成勞塗中易曳靈龜尾池上難尋彩鳳毛  
自覺不堪仍不可嵇康未欲絕山濤

別張平章仲一

四旬未老頭先白可笑區區紙上名張翰且休歸故里  
謝安應不負蒼生窮通此際難開口離合中年易動情  
恨殺溪流與山色天南地北送人行

吟詩

七情荒逸難追雅六義紛紜始到騷句穩先須辨長短  
字工端要定推敲言非精當功應少意不包氣漫高  
脫手若能圓似彈千迴萬轉任吟嘲

有感

大道荒蕪沒草萊一回翹首一回哀論文須謂可方可  
言志豈拘才不才美錦幾時無善製好花隨季有新開  
風人託物成騷雅未必初心在物來

適意

靜裏乾坤醉裏仙  
閒愁不到兩眉邊  
堂中立足有餘地  
井裏舉頭無大天  
淺酌酒杯消永日  
細開書卷度流年  
霸陵橋下長安道  
自在諸公鬪着鞭

自平

輸情盡意尚難行  
專利如何不致爭  
未解塞將他意滿  
但宜持得自心平  
溪聲遠作千年調  
山色高移萬古情  
自向書中識天爵  
已當克處漸能輕

對鏡

鏡中人向鏡邊羞  
有底功名早白頭  
識字豈知為物忌  
讀書空想解民憂  
星疎月朗原非畫  
老木蒼波宛是秋  
千古五湖高興在  
秋風不管未歸舟

適情

猿喜舉枝鶴啄苔  
能閒能宦各天才  
北山逋客攜筇去  
南隴幽人策杖來  
莫看鸞鳳栖枳棘  
任他斥鴳笑蒿萊  
據牀三弄桓伊笛  
豈愧孫登有嘯臺

自勉

鏡裏流年歟漸皤  
殷勤學道莫蹉跎  
黃金斷要經燒鍊  
白璧元曾受琢磨  
能自處心終始一  
任地開口是非多  
當如織女機頭錦  
每日須教進幾梭

接輿狂歌

唐虞風化尚純真  
天壤熙熙萬物春  
三代盛時存此道

六經今日付何人狂歌楚叟能知鳳  
絕筆宣尼自感麟  
滄海波光泰山色  
謾勞平地起纖塵

秋感

流光漸漸日相拋  
鏡裏斑斑見二毛  
世事短長量不定  
人生趨舍哂徒勞  
鴈翻夜月還三楚  
鶴駕秋風喚九皋  
獨有然庭間散客  
碧雲哦罷讀離騷

寡合

平生寡合嬾拘牽  
獨自看雲獨自眠  
伐木友逢多齟齬  
散花人至短因緣  
長教身類沾泥絮  
贏得心如出水蓮  
詩卷兩牛拖不動  
囊中却有一文錢

不同

高樓百尺卧元龍  
問舍求田那得同  
孟子臧倉譏禮義  
使君曹操識英雄  
鷓鴣不過一枝木  
騏驎更追千里風  
莫向華山陳老說  
睡魂不在是非中

古今

道存南北馬牛風  
古往今來了不同  
彼在古時諸事遂  
我生今日百憂逢  
趙高漫指鹿為馬  
李賀不羞蛇作龍  
太華山前一樽酒  
放開醉眼看蓮峯

憑高

憑高四顧入無窮  
萬物芸芸見此容  
世事醞鷄深甕裏  
人身糝米太倉中  
漫漫流地海無岸  
落落倚空山有峯  
一箇肚皮都着了  
更教誰去詰天公

觀豪

富貴繁華得幾秋，生存華屋老山邱。  
謝安携妓東山醉，李白騎鯨北海遊。  
水冷魚龍俱漠漠，天長魚鴈亦悠悠。  
求田問舍簾疎倒，慚愧陳家百尺樓。

對酒

浮世人稀七十強，憂愁朝夕半相妨。  
騷中不奈靈均若，酒裏從教太白狂。  
後清聲自嘹唳，舞來長袖任禳禳。  
枉將世務閒拘檢，杯卷東風醉一場。

西蕃道中

鞍馬生平四遠遊，又經絕域入蠻陬。  
荒寒風土人皆愴，險惡關山鳥亦愁。  
天地春秋幾蒼雁，江湖今古一扁舟。  
功名到底花稍露，何事區區不自由。

烏蠻道中

稠林夾路冠衣違，彪騎單行壓衆威。  
重勸小心防暗箭，深知老將識兵機。  
風號日落江聲遠，山鎖寒雲樹葉稀。  
鸚鵡喧秋似鴉雀，百千都作一羣飛。

烏蠻

華夷圖始豈虛傳，經過分明在目前。  
日月照開諸國土，乾坤包著幾山川。  
曾聞仙閣多官府，足信人寰有洞天。  
萬木歲寒青不落，喬松古柏想長年。

過白蠻

脊背滄江面對山，兵躡此險更無難。  
投亡置死雖能勝，

履薄臨深未敢安  
赳赳一夫當入路  
蕭蕭萬馬例征鞍  
已升虛邑如平地  
應下諸蠻似激湍

南詔

半生鞍馬苦勞形  
鬢影難求曉鏡青  
萬里又征南詔國  
九霄還識老人星  
直將日月銷書帙  
更假雲山作畫屏  
滿地干戈雖有酒  
不能長醉似劉伶

下南詔

天王號令迅如雷  
百里長城四合圍  
龍尾關前兒作戲  
虎賁陣上象驚威  
開疆弧矢無人敵  
空壁蠻酋何處歸  
南詔江山皆我有  
新民日月再光輝

滅高國主

事君忠義子孫優  
莽操源泉得遠流  
折足鼎空公餽覆  
剖心人苦鬼魂讎  
青山不管廢興事  
白酒可消今古愁  
願戢干戈息征伐  
歸期先卜兩眉頭

滿坦北邊

神機恍惚統鴉兵  
韜略閒文豈足憑  
風急旌旗高捲日  
夜長刁斗寂無聲  
陣雲垂作中軍幕  
螢火點成元夜燈  
萬里封侯男子事  
定誰唾手取功名

九日滿坦山

凌雲氣節鬢驚秋  
書劍荒寒事遠遊  
萬里嵐光乘馬背  
一川紅葉上鰲頭  
西風不管參軍帽  
絕塞空凋季子裘  
誰把茱萸念行役  
憑高拭目望神州

驢湫道中

烹水凝泥踏有聲北風催發更南征一旗颭颭山邊過  
萬里鼙鼓上行幾復回頭迷故國再堪屈指數前程  
鳳凰望斷麒麟絕空想簫歌奏太平

沾食山前

陰雲濃淡水洄環颭颭旌旗濕未乾慣熟人情生處樂  
崎嶇世路古來難一川野草霜前死萬樹西風雨後寒  
遙想家園未搖落不能容易報平安

烏蠻江上

一泓碧玉垂天影萬丈丹梯壯地形世路不能平險阻  
人生還得免口零月娥無語照吟坐河伯有聲呼醉醒  
明月烏蠻屬行役又攀叅角上青冥

江上寄別

軍中無酒慰飄零辜負沙頭雙玉瓶鞍馬幾年南北路  
關河千古短長亭好風到枕客愁破殘月入簾歸夢醒  
夢斷故山人不見曉來江上數峯青

江邊梅樹

江邊繚繞惜芳叢絕筆天真在眼中素艷乍開珠蓓蕾  
暗香微度玉玲瓏一枝倒影斜斜月滿樹浮光細細風  
明月行經山下路幾回特地駐青驄

過梅戶

龍角東昂斗柄迴春風無恙遠人歸干戈絕擾程程酒

景色堪憐戶戶梅鷓鴣波寒渾懶戲鴛鴦沙暖不驚飛  
青雲出岫緣何事馬上詩成雨莫催

過玲瓏山

世外徒聞說洞天桃源迷路再無緣摩青硯磊誰能鑿  
透白玲瓏自可穿別有一壺藏日月正看萬竅吐雲煙  
勞生得遇崆峒客煉訣還丹問隱仙

山寺

機花堆白麥苗青山寺南頭帳玉停流水縱橫成篆字  
遠山前後簇圍屏漢唐浩瀚開疆土蠻貊依稀在典刑  
士庶何曾避戎馬總知仁主惜生靈

峽西

鱗層竹屋倚岩阿是歲秋成粳稻多遠障屏橫開戶牖  
細泉磴引上坡陀民人各得安家住辭氣總如平日和  
簞食壺漿迎馬首湯征原不弄干戈

雲南北谷

征鼙震作旅魂驚直入雲南谷口行一水循環通地脉  
四山連避壯天城兵還失律難依險國既無人立可平  
馬援班師銅柱在誰知兒戲得功名

鶴州南川

閒情平日愜林邱不意南來得此遊遠近樹分山嶂列  
縱橫水入稻畦流一川風物撩詩興滿地干戈破客愁  
回首斜陽在喬木獨憐幽景更遲留



過鶴州

千山險阻此川平未審州何鶴得名綠水迴環澆萬壠  
黃塵隱約認孤城田疇傍舍存恒產兵火誰家得樂生  
戎罪今行原不殺遠蠻歸服感仁聲

春間

儘向青霄駕彩鸞鶴鶴先得一枝安詩書况味閒偏得  
歌酒情懷醉愈寬時雨荒山添潤澤春風野水動波瀾  
玄都觀裏桃花放應待劉郎醒後看

閒淡

閒淡功成百事休秋風生計任蕭颼客携酒至須轟飲  
人寄詩來愧懶酬碌碌無才甘自滯棲棲有道果誰求  
平途款段猶多蹶歷塊輸他紫燕騮

秋懷

梧桐殘翠落成堆燕去鴻來秋社催刺眼不須翻着襪  
放懷且好又持杯空階寒雨滴愁盡高枕曉風吹夢回  
咫尺登高是重九黃花更酌醉金罍

秋夜有感

竹影斜斜轉月輝西風颼颼透征衣菊殘愛菊人空感  
家遠思家客未歸戰馬頻嘶杖正健驚鳥無睡夜猶飛  
幾時一榻南窓下不見黃塵老翠微



劉太傅藏春集卷第一

劉太傅藏春集卷第二

七言律詩

夏日遣懷

拏雲心事倚樓邊  
鏡髮星星過少年  
學步誰知翻失故  
效顰自笑不成妍  
詩章騷雅唐新變  
字體風流晉舊傳  
吟寫總為閒伎倆  
且將消遣日長天

客中

人間機事細如麻  
落魄身心到處家  
無帚掃清堂下地  
有書遮靜眼前花  
兩杯粉潑貓頭筍  
一碗酥烹雀舌茶  
只此一朝公事畢  
焚香高枕卧烟霞

將歸見雁

一別沙陀白帳房數朝棲止李君堂轉蓬世路身渾懶  
趁食人間口尚忙百變浮雲隨物態千迴流水轉年光  
山城欲問春消息淡淡長空見雁行

西州客中

蕙帳空閒客塞城猿驚鶴怨可憐生風雲遠際千年會  
天地中含萬古情總指青山作歸計直將白髮換虛名  
向誰得遂求田意樓上元龍氣未平

黃河

萬仞崑崙頂上頭頽然委質下林邱九隨地勢曲千里  
一返天源經百州磧石西邊纔北轉太行南下已東流  
黃勻一線穿滄海直接銀河浸斗牛

冬夜飲南京酒

煨開琥珀明黃色散作薔薇軟細香歡伯情懷渾易見  
麴生風味實難忘一尊儘可消塵慮萬事何能到醉鄉  
盡道三冬無暖氣誰知春色此中藏

答崔夢臣

青春去却再難尋白髮還從鬢際侵顧我百年成幾事  
得人一語勝千金佳賓久望孫弘閣早稼專祈傅說霖  
此意朱弦但聊復不能聲處有知音

寄馮世昌三首

大中為體用時中酌古宜今道可通臨事若私先有礙  
立心非正後無功在天何問但存義進我無疑當效忠

有所不行須自反爭如桃李待春風  
心差利害一毫間誰肯尋思擴四端人事要於多裏煉  
物情宜向靜中觀止時休恨窠巢窄行處須開路徑寬  
天道好還冬對夏為仁由己意非難  
君子隨時出處同廟堂籌畫取英雄文經武緯通今古  
玉振金聲貫始終諸葛岡頭千壠月嚴陵波上一絲風  
自從兩漢分三國青史書誰第一功

呈全一庵主

百結千圍繫物繩古根金種未忘情莊周一夢花間蝶  
圓澤三生石上僧詩有仙風拋世網酒藏奇計破愁城  
放他少室山頭月代燈流傳不盡燈

呈南庵友人

一篋詩書三尺琴忘懷鍾鼎是山林聖賢處世常存道  
男子遭時始見心嗅殺芳蘭無惡氣聽殘流水只清音  
虛名肉味從來薄况復聞韶歲月深

春日效宮體二首

兩洗芳塵絕點埃桃花零落海棠開沉香亭小圍紅樹  
太液池清映綠苔夜月也曾懸漢殿朝雲何只在陽臺  
六宮簾捲東風軟一派仙音翠輦來  
嫋娜鬢肢窈窕娘雲鬟十八闌新妝曾憐歌舞留香閣  
乍學笙簫入洞房禁苑春來夜競放閒階雨霽燕爭忙  
長生殿裏明皇醉夢斷華胥白日長

看書

香焚銅鼎翠烟盤無意安心却自安一語終身莫能踐  
九經盡日若為看流行似水那云易習慣如天不覺難  
大地含章秉元氣木生松柏草芝蘭

習字

硯水冰清墨細研紫毫深蘸試華笺始從大裏收來小  
復自方中畫作圓鋒隱豹眠千嶂霧勢雄龍跳九重天  
鸞飛鳳立難窮變要把王顏得處傳

和林道中

扶桑日曉雨初收襟袖涼生六月秋兩巒雲山夾行客  
一川烟草看飛驕玄車軋軋長轟耳白帳連連不斷頭  
宮闕上橫龍虎氣和林遙見帝王州

禁中

帳中書帙案頭存大禁炎炎不出門難為蒼生濟饑渴  
漫搜詩句廢晨昏啣珠報德成勞想衣錦還鄉莫浪論  
時止時行吾不強笑他楚些作招魂

蜀先主孔明

智涉圖深往事非茆廬一論定真依風雲龍虎隨時有  
魚水君臣自古稀月照錦江翻夜色烟波玉壘動朝暉  
精英不死青天上猶得文昌奉紫薇

跋李太白舟中醉卧圖

仙籍標名世不收錦袍當在酒家樓水天上下兩輪月

吳越經過一葉舟，壺裏乾坤無晝夜。江邊花草自春秋，浮雲能蔽長安日。萬事紛紛一醉休。

跋李白醉歸圖

五斗先生未解醜，一生愛酒不曾醒。人間詞翰傳名字，天上星辰萃性靈。鴈帶煖回波泛綠，燕啣春至草抽青。紗巾醉岸南山道，幾處哦詩補畫屏。

太白還山圖

一片靈臺照世明，共傳太白是元精。心中有道時時樂，眼底無塵物物清。千首未知詩作癖，百杯尋與酒為盟。長安多少風和月，不盡先生吟醉情。

孤雲

觸石初興一寸微，漸張鵬翼赴天池。無心出岫何憂累，有象懸空不礙飛。斜日只期風送遠，枯苗還怪雨來遲。曾同李愿棲盤谷，應是從龍忘了歸。

仙客

骨青髓綠紫霞腮，玉府真游出世才。眼裏方瞳萃神秀，胸中明鏡絕塵埃。風生嵩嶽三花樹，月浸瑤池七寶臺。夜半朝元初飲散，醉飛星馭到蓬萊。

憶鬪頭王先生

玉京金闕五雲間，月滿瓊樓十二欄。仙子已隨鸞馭去，世人空想鶴書還。喚回石上三生夢，燒盡爐中九轉丹。別後幽懷渺何許，悵然滄海隔蓬山。

憶實侍講先生

煖到沙陀雪已殘，春光猶惜照衣冠。  
旋酬世事心渾懶，不見幽人眼益寒。  
明月只於圓處缺，佳期常向易中難。  
想思一日三千里，欲學忘情自未安。

途中寄平章張仲一

觸熱從軍數載還，高家書記到何官。  
道存賢聖行藏裏，人在乾坤動靜間。  
為善不圖垂報施，濟時寧畏涉艱難。  
惟君胸次明如鏡，照我區區兩鬢斑。

呈焦尚書仲益

道義猶難輔友生，可將名字競時名。  
為人當有往還理，所事豈無憎愛情。  
棋上高低誰計較，鏡中妍醜自分明。  
泰山多少閒堆阜，滄海漫漫一望平。

寄津長光

雲溪側畔竹林邊，未塞平生未了緣。  
詩裏久懷方外士，酒前猶伴飲中仙。  
真經縱暇開金卷，難字還慵檢玉篇。  
師許傳韻法故及之槐火石泉烹雪藥，阿師此夢共誰圓。

憶顏仲復

滿座春風笑語，客中長記在家情。  
赤心豈沒新朋友，白髮難忘舊弟兄。  
夜雨正令人百感，秋窓忽放月孤明。  
禪房花木通幽處，水遠山長夢不成。

歲暮有感三首

歲暮嚴風曉夜寒，老烟蒼色滿關山。  
騷人思和陽春曲



遠客賡歌行路難美酒欲期十日醉浮生誰得百年閒  
揚州解舍週遭樹清淡梅花也屬官

歲寒親友淡相陪助發詩程酒兩杯情與古人千里合  
夢聞隣曲一聲回虛心立節霜秋竹瘦影橫窓月夜梅  
天意漸隨人莫測龍蛇飛動待春雷

蹤跡飄零事願違生平親舊總披離同人憂樂猶難易  
與世浮沈果是非寒雪自應隨臘盡菁莪何恨得春遲  
玉京一望漫於海安得超然控鶴飛

送鄉僧

中年懷抱要寬和故友依依奈別何夢到家來殊不遠  
情隨人去更還多龍岡雪盡回春色鴛水冰開漾月波  
若遇相知問蹤跡穹廬近日到沙陀

寄友人四首

閑裏詩書慰寂寥低垂絳帳謝塵囂心如秋月十分朗  
病逐春水一向消陋巷顏淵貧有樂安車子貢富無驕  
更看萬丈頽波裏砥柱巍巍不動搖

親朋離闊往還稀十載天邊一雁飛北闕書人俱自獻  
南山詩客與誰歸碧雲望久不成興青障夢殘還又非  
明日桃花如爛錦且須携酒賞春輝

悠悠離闊感中年我輩情鍾豈不然好景與時渾易過  
可人和月只難圓五更殘夢鷄聲裏千里歸心鴈影前  
漢北雲南空浪走今春又負杏花天

香滿檀心雪滿枝梨花開近海棠時  
隴西鸚鵡歲金籠  
海底珊瑚絞鐵絲  
勁盡快心觀晉字清光在眼讀唐詩  
功名富貴非吾事惟有幽人是所思

答友人留飲

黃塵道路競拋梭不覺行年四十過  
世事愈多愈瑣細  
人生漸老漸蹉跎  
愁城平卻無遺址樂府開來有妙歌  
桃李花間一壺酒君留不醉欲如何

會故人小飲

俗事長將樂事違  
小園今日偶成期  
喜君落筆題詩就  
笑我停杯吸酒遲  
柳葉已將春雨展  
桃花猶待曉風吹  
倚欄紅杏低無語應為勞心蝶不知

勸友人酒

西風落葉共蕭颯  
百感中來不自由  
豪客空攜鐵如意  
舞孃徒費錦纏頭  
曳過雨脚雲歸岫  
湧出山頭月滿樓  
一曲清歌一杯酒為君洗盡古今愁

為友人解嘲

德益休休偽益勞  
泰山不重亦毫毛  
九成豈脫試金石  
一割難同切玉工  
繫日繩頭宜自損  
拏雲手段任他高  
元龍骨化墳中土誰是中州第一豪

孤懷

孤懷懶與世浮沉  
哀樂中年白髮侵  
射隼高墉猶可待  
亡羊多路定難尋  
鏡明惟解照人面  
尺曲不能量我心

流水高山無盡意伯牙指下有知音

客興

關河牢落別離中到處題詩記轉蓬啼鳥不知春是客  
落花還逐水流東雲開千里遠山碧樓影半溪殘照紅  
雌蝶雄蜂不同類雙雙相趁舞迴風

讀韓信傳

將將將兵各有權棋家一着要爭先依平得路猶難保  
弄險成功豈易全破趙有謀都一日假齊無分僅三年  
良弓高鳥俱塵土贏得英雄一惘然

再讀杜詩

規矩方圓稱物施運斤風度見工師干霄氣象動高興  
濟海波濤生遠思三月聞韶忘肉味幾年疑郢和巴詞  
騷人盡在清光裏恰似中秋月滿時

讀山谷詩

清竒淡雅破工夫句句冰霜字字珠並舉鴻方上霄漢  
相忘魚已得江湖筆頭應有神靈助言外全無翰墨拘  
酒醒夢回秋氣爽似看明月在蓬壺

讀梁甫吟

調高辭雅動知音聲寂名存意愈深千載有聞諸葛語  
三人無愧晏公心稱賢未必皆能肖弔古何嘗不在今  
荷得鋤歸茅屋底一篇梁甫更誰吟

秋江漁父圖

白蘋紅蓼滿滄洲江上清風倒玉樓出沒不拘同水鴨  
往來無繫伴沙鷗烟波圍繞幾魚舍天地斜橫一釣舟  
簑笠為渠相蓋管瀟瀟風雨不勝秋

秋江晚景圖

落筆縱橫不自休抹成小景絕清幽碧波千里楚山晚  
紅葉一林荆樹秋古渡任分南北岸長檝自送往來舟  
十年間事漫如昨對此依稀復舊遊

竹林七賢圖

螳螂怒臂大車前禮樂蕭條幾百年蘭省久無三老貴  
竹林空有七人賢忘形到底為形累嗜酒尋常被酒顛  
何似公何月臺上一聲長嘯裂秋烟

宋漢臣墨梅

體盡江邨雅淡情映來紙上照人清枝梢欲向風中動  
根幹原從筆下生幾簇芳英雪妝點一灣新月玉斜橫  
夜光不死西湖見也索驚嗟問姓名

梨花

玉骨冰姿映曉光霧盈檀蕊洗新妝夭桃艷杏果誰賞  
雌蝶雄蜂空自忙仙桂是高靈有種海棠雖美却無香  
司花護惜花長好莫遣東風取次狂

竹

幾竿蒼翠抵千金對鼓焦桐意更深雙淚洒時勻作點  
七賢居處密成陰飛霜著葉不改色流水漱根還有音

我似此君君似我枝枝節節本無心

竹筍

亭亭瘦玉倚疎籬日夕摩挲恐長遲立節未能森似束  
出頭休若銳如錐共言愛物終成癖不道忘情却近癡  
料得此君霜雪後虛心惟有子猷知

月中桂

丹皮翠葉寶花鮮深固靈根不記年老穎共為天上物  
嫦娥同有月中緣蓬萊山裏紅瑤草太華峯頭白玉蓮  
安得移來都一處醉看光彩照詩仙

秋齋

蕭蕭落葉打窓櫺夢覺幽齋熟睡僧萬里西風揚鷺鳥  
半窻烘日聚癡蠅物華老盡只秋健天運斡回非力能  
且倒芳尊煖和氣門前物態冷如水

太清宮

一簪鶴髮瑩童顏喬木森森古殿寒自駕白雲還帝闕  
不傳紫氣映函關五千道德留真誥八百工夫鍊大丹  
地老天荒無覓處猶龍那復落人間

因張平章就對東坡海棠詩二首遂賦一首

一種奇花號海棠十分顏色豈須香雨中有淚真傾國  
月下無言更斷腸不待金盤薦華屋高燒銀燭照紅妝  
少陵避諱將佳句留與眉山蘇二郎

因宋義甫宿香山寺

摩空削出碧芙蓉，繾綣香山一帶峰。  
野樹去年曾繫馬，閒雲今日復從龍。  
玉鉤三寸月沈水，琴調數聲風入松。  
清徹夢魂眠不得，覺來那假曉樓鐘。

秋晚同友僧宿潞南山寺

集林倦鳥已成棲，石磴連沙澀馬蹄。  
晚寺共攜明月入，寒巖誰聽雪猿啼。  
愁行十里九盤路，夢斷三更三唱鷄。  
聲利不關陶靖節，黃花零落醉如泥。

宿山寺

是非不到石壇邊，物外閒人第二仙。  
赤羽林梢映斜日，白虹山半駕飛泉。  
客來總是尋僧話，猿去多應伴鶴眠。  
一曲清歌古松下，且依勝境謝塵緣。

聞宋義甫對竹引

高情遠韻無凝滯，發作聲音指下彈。  
玉調未曾終一曲，朱絃何故疊三歎。  
優游似道虛心易，感慨如筠立節難。  
昨夜綠筠亭上醉，正同風雨夢珊珊。

宋義甫彈秋風

穹廬悄悄夜漫漫，午醉醒來坐席寒。  
富貴有媒皆豹變，功名無分獨螭蟠。  
子陵實愧三公爵，清節非輕一縣官。  
高捲瓊簾對明月，秋風一曲入琴彈。

戲宋義甫

香飄庭院牡丹妍，荷貼池塘小翠圓。  
生物不知春有老，照人還愛月無偏。  
黃塵道路嗟游子，紫陌烟光誤少年。

欲着儒冠替僧帽而今直得幾文錢

佳人

錦心繡口性蕭閒學海波瀾抱不乾奇語八篇傳欲滿  
陽春一曲和皆難佩蘭襲襲生風韻懷玉溫溫辟雪寒  
別後佳人渺何許倚樓空詠碧雲端

宿中山乾明寺

客散關門厭事譁爐香滿屋卧煙霞人辭故里凡三載  
僧到伽藍自一家夢破小窓浮月色漏殘寒角奏梅花  
天明又上滹陽道駕水歸程漸有涯

過居庸關

車箱來往若流泉絕壁巉岩倚翠烟限破中州四十里  
鑿開大路幾千年函關不謂平如地蜀道誰知險似天  
萬里揮鞭猶咫尺誰能掌上保幽燕

過也乎嶺

一夜陰雲風鼓開嶺頭凝望動吟懷烟分雪阜相高下  
日出瓊車競往來天定更無人可勝智衰還有力能排  
中原保障長安道西北天高空九垓

鷄鳴山

俯瞰灤陽小洛城一川山色萬家屏翠環有蒂雲初合  
碧玉無瑕兩乍晴岩穴直通天地氣峰巒平揖斗牛星  
野僧不管人間事卧聽洋河聒耳聲

桓撫道中

老烟蒼色北風寒驛馬趨程不敢閒一寸丹心塵土裏  
兩年塵迹撫桓間曉看太白配殘月暮送孤雲還故山  
要趁新春賀正去翦頭能不愧朝班

桓州寄鄉中友人

青山四合路縱橫解纜烏桓古塞城五載轉蓬離故地  
幾時促席話平生停雲靄靄落春雪明月輝輝開晚晴  
適意寧無一罇酒渴塵難洗為誰傾

大磧

漫川沙石地枯乾入夏無青雨露怪人馬數程饑渴裏  
風塵一月往還間側橫鰲背登高地淡掃蛾眉見遠山  
安得司春生物訣桑田也似海東灣

秋日途中

半紙功名滿地愁都教白了少年頭早應未拜曹參相  
終不當封李廣侯曲水亂山紅樹晚西風殘照白雲秋  
歸鴉一片投林去自笑勞生未解休

丁未始還邢臺三首

十年朔漠到鄉城里巷傳聞喜復驚老者相看更相命  
小童爭拜又爭迎忘懷不講世俗禮無外始知鄉黨情  
向日垂髫盡冠帶旋通小字始知名  
布袍抖擻容途塵閭里歸來感慨頻一代衣冠風又變  
千年城郭物還新黃耆總作墓中鬼街巷半居鄉外人  
精舍東邊存舊宅眼前渾不識比鄰



清明左側上歸鞍急到邢臺六月間  
萬里春風吹綠鬢  
一城和氣煖朱顏  
昔年林下間為貴  
今日鄉中貴是閒  
布衲藍衫人調笑  
如何不着錦衣還

新春有懷

笛聲吹落小溪梅  
笛位還看斗建迴  
蟄物得春當出地  
阿香貪睡不推雷  
百年囊裏詩千首  
萬事花前酒一杯  
別後故園桃李樹  
他年宜肯重栽培

春日園中

人生難預定行藏  
且著閒吟寄醉鄉  
還有江湖供酒杓  
豈無珠玉入詩囊  
春風夜發蜂兒鬧  
細雨泥融燕子忙  
一架酴蘂開較晚  
海棠雖好惜無香

春日寄友二首

東風吹夢入家頻  
夢覺來時總不真  
處士固知為贅物  
還山終欲作閒人  
漁樵有話同誰說  
花柳無情各自春  
一曲高歌一杯酒  
江邊醒客莫相嗔

暖過新春嶺峭寒  
寒鴉欲逐曉風還  
萬千世事回頭後  
四十流年倒指間  
白酒有時長可醉  
青山無處不堪閒  
功名到底誰能了  
贏得勞生鬢早斑

正月十三日得鄉官書

浮雲流水不相依  
時止時行各自知  
萬事至天無不樂  
一心於道有何疑  
溪邊楊柳飛花早  
海外蟠桃結子遲  
一樹海棠方破萼  
東皇應着好風吹

劉太傅藏春集卷第二



劉太傅藏春集卷第三

七言律詩

二月寄鄉友

漠北燕南幾日程  
雁來人去總飄零  
春陰將散好風至  
野燒漸空芳草生  
橋下迴環駕水綠  
城頭突兀鵲山青  
此情擬託新詩遣  
寫就新詩轉繫情

春日遣懷

盖世功名一局棋  
千年城郭昔人非  
分開春色花休妬  
流盡年光水不知  
詩酒可娛惟自得  
林泉雖好幾人歸  
長繩不繫天邊日  
寄與春風且慢吹

春情曉望

水漲池塘雨洗塵際空樓閣倚欄人星替月落千山曉  
日暖風和萬物春何樹落花飄蕩遠誰家飛燕往來頻  
眼前盡是無聲句却恐詩人道不真

間中

成物心存一寸丹行年半百鬢毛斑鷓鴣春春期同列  
猿鶴顯顯怪未還懶性從來倦馳逐坦懷原不厭蕭閒  
平生傲世東世相金馬門中是隱山

溪亭小飲

亭前桃李水邊樓與客攜壺慰倦遊眼底誰知花嫵媚  
人間惟有酒風流情原易感千生在愁不難消一醉休  
傳與京華美年少莫將白髮博封侯

秋晚

秋晚梧桐翠已殘松風竹雨正珊珊功名果是將人誤  
懷袍惟除着酒寬一枕清風醒後覺滿軒明月卧中看  
乾坤裏許原無事閒殺東山舊謝安

寄友

歸心搖蕩菊花期濁酒留連奈別離方外半生人事略  
天邊九月雁書遲昨非今是翻然覺坎止流行斷不疑  
却怪青春無拄杖滿頭白髮儘相欺

答隘客

坎蛙自蔽無餘地海若汪洋納百川士子行藏須達節  
人生貴賤定由天翰林自不拘吟放御史誰曾管醉顛

萬事轉頭都是夢，枉教愁擾轉頭前。

答鄉友

人生終老覓菟裘，白髮行藏獨倚樓。  
南鴈縱能傳尺素，西風不解送扁舟。  
蒼山老樹烟波晚，零雨疏星水墨秋。  
願偃旌旗舞干羽，功名輸與玉關侯。

倚樓

倚樓兩鬢暑風涼，滿眼西山晚翠長。  
書傳紛紛自今古，藻唐疊疊有興亡。  
一時王謝訐方略，萬古伊周合廟堂。  
致主澤民非我輩，任人疑怪水雲鄉。

夜時客至

翠染新成楊柳絲，紅妝爭簇海棠枝。  
官身縱酒惟間日，老眼看花勝少時。  
好客一來深有幸，曲卮滿勸不須辭。  
清明壯健相逢處，莫負唐人七字詩。

歲暮遣懷

白首何人望省郎，青春無伴共還鄉。  
采薇縱廣飢難療，食肉非多智豈長。  
半夜談天人寐寂，明朝涉世事茫茫。  
雪消咫尺春來到，擬對芳華醉幾場。

慶王承旨慎獨八秩之壽

白玉堂中第一人，黃金殿下老朝臣。  
富公同享八旬壽，顏子不違三月仁。  
生值明昌建元歲，位符奎壁主文辰。  
當年浩氣堂堂在，更看凋零楚樹春。

會顏仲復言懷

叅破希夷沒眼禪閉門春靜日高眠忘機漁父收綸後  
寄物狙翁賦芋前白髮只添人老境青山未遂我閒緣  
東風雪與梅俱盡庭草生芳又一年

讀書

太初元氣判鴻荒一派淳風自古皇肅肅皋夔正堯典  
堂堂周召扶成王人無繼出德漸降時不再來天莫量  
獨善固非君子志幸容終日掩書堂

清明日欲攜酒與橙赴廉張二平章會俄奉命

出城途中作

風色蕭蕭春尚寒行程高望五雲間城中漫覓棲身地  
馬上多逢得意山世路何長窮白日人生能幾已蒼顏  
黃橙綠酒清明會好處從來天地慳

寄張平章仲一二首

主家殷重客寬懷席面春風勝謝臺絃管美聲消酒暈  
壺觴清興引詩才翠簾重捲月新上羯鼓不催花自開  
帽側袖垂扶又倒家人轟笑醉歸來  
南北春秋鴈往來一年懷抱幾番開風雲氣在原飄逸  
錦繡詩成不剪裁飲但飲人非飲酒憐須憐德亦憐才  
自因量窄常先醉慚愧君家大盞臺

遣懷寄顏仲復二首

名利場中名利兒寸心徒用惡尋思人才自有安排處  
物理空無石泰時縱量傾殘一壺酒暢情吟殺七言詩

詩成酒醉東風晚，月照梨花第一枝。  
朱顏白髮任流年，睥睨揶揄置兩邊。皆醉皆醒人豈爾，  
一鳴一息物當然。飛騰起處須從地，智力窮時便到天。  
惟有無生話無盡，何如絨口坐癡禪。

寓桓州

百年行止料皆難，今是昨非約一斑。辜負風心泉石畔，  
纍垂短髮縉紳間。夢回枕上聞歸雁，雨霽城中見遠山。  
三徑就荒松菊在，人生底事不能閒。

思歸

溪山出境老情懷，閒著魚磯與嘯臺。陶穀果然無相分，  
翰林却道有仙才。塵容俗狀今如此，綠鬢朱顏安在哉。  
會向桃源訪消息，雲迷洞口沒人來。

山居曉起

禪客生涯貴寂寥，幸居山寺遠塵囂。情難斷處千年在，  
心肯閒來萬事消。新月看殘還舊月，今朝過了任明朝。  
須知元氣常流轉，平旦無風自海潮。

晚遊

山水清佳自在遊，利名莫莫復休休。瘦筇此日真忘世，  
長笛何人效倚樓。鴉落點成千樹墨，鴈飛橫絕一天秋。  
歸來小院松梢上，新月低斜玉一鉤。

歸來

昨非今是海漫漫，蜀道容吾曳杖還。數友偶成詩酒會，

一年不入縉紳班  
風吹柳葉先舒皺  
春窘桃花亦破慳  
但得樽前開口笑  
未為辜負此生閒

樓上

睡起重持金曲卮  
要憑芳酒緩離思  
醉魂屢作還山夢  
吟興多因寄友詩  
千里波光風定後  
一樓山色雨晴時  
碧雲望斷佳人遠  
投樹棲鴉已滿枝

春暮有感

殘花幾樹酒盈卮  
但願春歸熟醉時  
楊柳隨風飄翡翠  
海棠和雨滴胭脂  
半生不定猶飛梗  
諸事無能強賦詩  
昨日溪邊閒倚杖  
水明如鏡髮如絲

睡起

連歲驅馳萬里程  
碧臺歌舞笑爭名  
山中猿鶴丹心在  
塞上風烟白髮生  
對客倦談當世事  
向人難恣未歸情  
雪花亂打西窓急  
總似芭蕉夜雨聲

捲簾

烟籠碧草繞迴溪  
水向東流日向西  
鴉隊落來和樹黑  
鴈行橫處與雲齊  
杯中有物甜如蜜  
心上無愁醉似泥  
蝸舍睡醒簾半捲  
遠山相擁翠環低

遣懷

世事茫茫今古同  
人生無奈落西東  
幾年羈旅雁聲裏  
十里家鄉蝶夢中  
梧葉打殘秋夜雨  
菊花開盡曉晴風  
淵明醉卧東籬下  
不管明朝酒盞空



銀河

一道銀河萬里橫  
遙看似接鳳凰城  
晴波不受微雲點  
夜色還隨皓月明  
七夕橋成牛女會  
九秋霜降浪濤平  
歸來試問乘槎客  
却到人間有幾程

大理途中寄賓侍講先生二首

昔聞名德仰高山  
近識高賢未敢攀  
富貴不求驚見擢  
田園成趣喜歸閒  
一心止水常平湛  
萬事浮雲任往還  
解把陽和涵養就  
不言春色滿人間  
元氣勻將造化施  
自然間雅貴天資  
只言世上無黃石  
誰信人間有紫芝  
一見頓忘名利志  
劇談渾沒是非辭  
別來萬里知安否  
時復臨風有所思

重看江上梅花

萬里縱橫戈戟中  
歲云暮矣遇芳叢  
江邊踈影斜斜月  
天外幽香細細風  
初見一枝珠琲瑤  
再看滿樹雪玲瓏  
無才不得西湖句  
空對水容駐玉驄

寄張平章仲一

春光滿眼酒盈樽  
難得同觀易見分  
秋氣著人涼似水  
晚山和我淡如雲  
清歌月影簷頭轉  
殘夢鍾聲枕上聞  
元鳥欲歸黃鳥斷  
詩哦伐木正思君

野園會飲

都城不得縱蹉跎  
樂事還於僻處多  
酒裏薰陶成受用  
胸中磊磊自消磨  
樹頭鳴鳥關關好  
花底春風淡淡和

一到醉鄉如洞府人間日月任飛梭

暮春樓上

松風竹雨夜珊珊睡起樓頭怯曉寒手裏酒杯隨接飲  
眼前書冊懶拈看綠稠樹葉迷蝴蝶紅盡花枝放牡丹  
欲覓春歸無處問滿城飛絮凭欄干

漫成

上苑風光爛漫遊紫蘭黃菊各春秋一心不逐榮枯變  
萬事寧為得失憂充塞乾坤惟道在博通今古有書求  
慣曾漳畔翱翔雉莫謂樊籠不自由

小飲

清歡媚景好光陰自古猶難況在今坐下人多年漸老  
樽中酒滿興偏深將歌雪曲先傾耳疊泛霞杯足快心  
百歲奔忙緣底事且拚一醉謝浮沈

別友

鸞鳳棲梧枳棘空車行路步有窮通九秋霜落樹無綠  
三月日迴花自紅物態莫驚時冷煖人生還恨限西東  
一盃酒盡陽關曲萬疊雲山入望中

寄友弟

一別陽關金曲卮深秋節物動離思蝶飛籬畔菊開後  
鴈滿江頭楓落時才大難為鸚鵡賦情親易感鶴鴒詩  
願將杜老真誠語寄謝悠悠世上兒

思友人

亂點蒼山壯地形西風白草動秋聲幾條野水馬爭飲  
一帶荒田人不耕鴻雁程隨處客龍岡鴛水故園情  
聞河月底人千里一夜相思白髮生

田家

衙門晝掩絕蕭騷籬籬充腸體布袍許汜壠頭甘自若  
陳登樓上有誰豪有田何必懸金印無犢還須賣寶刀  
青帝布恩先畝畝穀生如草兩如膏

漁父

撥棹垂竿日日同藕花叢了荻花叢朝雲暮雨閒身外  
春水秋山醉眼中十里烟波明落日數聲漁笛響西風  
紅塵不到孤舟上誰得江湖伴此翁

回杖

遠山橫掃翠眉低春事關情鶯更啼策杖欲尋佳境去  
出門還被亂雲迷野花野草同三月間鷺間鷗與一溪  
沽酒歸來北窓下人間如夢醉如泥

贈棲霞王真人

壺內風光境界寬骨青髓綠發朱顏三生勘破人間夢  
九轉燒成日裏丹鶴馭不知天地閱鳳書還許水雲間  
隨緣應世元無事一片靈臺處處安

再觀木庵書

書法都歸篆意圓木庵別有筆中天一家楷式由來妙  
半世功名非偶然我欲窮源蒼嶺上誰能得趣魯公前

鰲山成道寧無日更爲挑燈續斷篇

臨蒼頡書

落魄心情與世疎人皆知癖不知愚平生專究伏羲易  
漸老又臨蒼頡書但願自宗爲法派不辭人笑費工夫  
他年盡變龍蛇體更看飛雲滿太虛

重九後作

地雄西北帝王州一月登高未即休紅葉黃花空應節  
蒼山白草不勝愁寒風無意頻吹面破帽多情却戀頭  
恰遇鄉人來送酒淵明不醉復何求

聞鴈

織錦文章學不成更堪斷句覓詩名黃花陡覺添愁思  
白酒良能解宿醒月裏關河家正遠樓頭鼓角夢初驚  
尺書寫下還慵寄忽聽風前有雁聲

過并州

山川滿目碧成圍流水悠悠鴈北飛一枕黃梁新夢斷  
千年華表昔人非烟霞有路迷芳草桃李無言對落暉  
明日征鞍泊何處春光雖好亦思歸

自澤州過懷衛

渡澤南來過二州太行背腹皆兼遊陷泥蹶馬十朝雨  
落葉粘人九月秋白日悠悠又西轉黃河滾滾心東流  
山林水竹行程裏是處都堪畫扇頭

對酒

秋水澄澄照影孤百年旅逆轉蘆聊生莫問鳩為計  
憶遠須憑雁寄書北海鯨魚鉤已重中州麟鳳網猶鍊  
清愁萬丈干雲月着酒燒來自破除

贈藁城董萬戶

老師曾酬報國心遺君兄弟茂如林荆衣一院長生色  
棠樹千年勿剪陰私物應官於已薄家童代役感民深  
更能設藥除羣病四境誰非播德音

感事

萬事茫茫體一如只爭秉性有精粗若非禮義人誰教  
又是詩書我更愚蜂蟻亦能推猛士廟堂安敢侮樵漁  
愚夫愚婦誰能勝料必賢明見是圖

贈完顏伯誠甫

仲德之子也

春風秋月透孤房恨殺閑睢窈窕娘枯木岩前空積思  
散花天上不聞香生民世系來千古相國人家只一郎  
安可斷流同潦水合隨江漢入汪洋

對菊

啼殺前邨梅後鴉黑頭江總早還家荆山玉定難同石  
麗水金原不在沙誰有才猷資國用自無勲業向人誇  
滿城風雨重陽近搖蕩歸心對菊花

對月

鶴髮貂裘映月波兔疑蟬戀竟如何絕知詩老丹心苦  
未信書生白眼多半日香風飄桂子九秋寒色帶姮娥

無人共竭樽中醪，獨酌清光送浩歌。

新春城外

青山懷抱古城隈，楊柳梢黃海雁回。  
詩思不高無好句，酒腸雖窄有餘杯。  
嶺頭寒勝雲猶雪，爐內香消火已灰。  
為問名園起花手，可將桃李強栽培。

過豐州二首

平生清興在林泉，世路誰教也着鞭。  
馬上青山長萬里，鏡中華髮已三年。  
又經墨水還沙漠，才自烏蠻出瘴烟。  
盖世功名正低首，西風秋櫟一聲蟬。

退山瀾瀾水西流，夾路離離木杳稠。  
出塞入塞動千里，去年今年經雨秋。  
晴窗高顯寺中塔，曉日半明城上樓。  
車馬駢闐塵不斷，吟鞭斜裊過豐州。

雲內道中

野水平蕪間野花，寒雲淡淡際寒沙。  
閒禽向晚無投樹，遠客逢秋空念家。  
萬里經年走風雨，一身無計卧烟霞。  
來朝人上居延道，懷古思鄉改鬢華。

過東勝

秋山漠漠晚烟橫，半落關河鴈一聲。  
鍾鼎無媒希望斷，江湖有志利名輕。  
皇天不弔衣冠絕，神物還從臭腐生。  
慘淡風雲會銀夏，短衣匹馬過邊城。

過鹽州

山川紆曲際遐荒，萬國華夷入混茫。  
草木不生枯燥地，

風雲長慘戰爭場兩餘千嶂添秋色塵定孤城下夕陽  
感慨征人太辛苦東山詩就鬢毛蒼

四月望日途中大風

慘淡乾坤震鼓聲飛沙轉石捲雲霓山川道路俱難辨  
南北東西一向迷聲浩浩時霾雨落色蒼蒼處玉蟾低  
四更力少猶吹蕩催上征鞍驟馬蹄

過天井關

雲冷風高天井關太行嶺上看河灣九州占絕中原地  
一壑攔迴左界山王霸分爭圖未捲英雄塵戰血猶殷  
華陽春草年年綠汗馬南來不放閒

關外感秋二首

白露為霜陰始凝挽回春律果誰能只宜絨口人間事  
未解忘情客裏僧黑水浪濤方括括南山氣象愈棱棱  
草枯葉脫西風勁正看掀飛掣背鷹

一岩幽隱幾時還猿鶴蕭條蕙帳閒畫餅功名誰得飽  
浮雲富貴此堪攀歸禽側畔千章木行客前頭萬疊山  
不道世人無定分本圖何事鬢毛斑

宜陽道中

一架飛梁映霽虹玉流通灌稻畦中烟雲忽鎖山川好  
城郭新修市井空遠樹深深人出沒長空淡淡鳥西東  
季鷹不憶蓴鱸美萬里秋風又轉蓬

龍德城上

風還麥壠掉青旗烟歛人家住翠微綠水歌殘山落落  
碧雲望斷林依依一封鄉里書才到三月天涯客未歸  
燕子卽將春色去遊蜂空趁落花飛

六盤會仲一飲

青雲自笑誤歸期回首關山滿別離禮樂詩書君負苦  
東西南北我成癡碧梧一葉秋風起銀竹千竿暮雨垂  
塞下相逢一杯酒貴傾肝膽略無疑

寄河西沙陀

黃雲山外接黃埃歸路漫漫沒草萊馬上彎弧皆尚勇  
機頭錦織孰憐才星珠千顆徹銀漢月鏡半圓橫玉臺  
寂寞沙陀逢七夕西風蕭瑟夢中來

春興

夜滿樽前酒滿卮春風桃李噴開時醉中却忘三春夢  
醒後吟成七字詩大地豈無騏驥志高梧原有鳳凰枝  
閒人不為功名鄙出事相關未暇思

楸鎖蒼烟白鳥鳴春風夜滿鳳凰城無才難料人間事  
有酒何求紙上名分別是非誰得正摩娑今古自宜平  
閒愁枉壓眉頭重且放襟懷伴麴生  
青樓歌舞碧城春王謝風流日闌新洛下殘花猶殢客  
墻間餘酒也狂人無田易佩蘇秦印有扇難遮庾亮塵  
白晝錦衣多脾脫一廊何處不安貧



三冬蟄物聽雷驚二月餘寒尚旅亭春色未歸桃李林  
劍光空射斗牛星待船容子思同濟沽酒人家怨獨醒  
一曲滄浪洗烟雨汨羅江上楚山青  
東君號令忽傳新一點陽和處處勻白玉花殘梅過臘  
黃金條嫩柳回春雁離湘浦獨淹容鶯轉皇州已可人  
睡殺海棠吹不醒風前桃李弄精神

劉太傅藏春集卷第三

劉太傅藏春集卷第四

七言絕句

遣懷

靜守空廬事不侵  
閑中一日抵千金  
傍人自任多評論  
此是寥休道者心

曉行

向曉春風暖更清  
殘星和月落孤城  
金烏飛上扶桑樹  
先是東方一片明

中秋月

月宮丹桂影婆娑  
簾捲珠樓謔素娥  
縱有開元遺譜在  
人間難覓紫雲歌

過界牆

地老天荒雪亦蒼  
車頭軋軋轉羊腸  
短衣蓬鬢沙陀路  
一歲三番過界牆

有懷遂長老十一首

香火僧齋闕靜緣  
黃塵道路又三年  
故人不似青山色  
擡起頭來在眼前

小院桃花畫掩扉  
東風軟軟日遲遲  
雨鄉莫恨關山隔  
自是人生有別離

東園花柳照青青  
野客閑陪賞翫人  
望見城南山色好  
却回騎馬入紅塵

掃地焚香應接餘  
翠雲盤結滿穹廬  
閑人不解謀生事  
翻過牀頭幾冊書

雨過幽庭長綠苔  
東風時為掃塵埃  
無人曾見春來處  
門外桃花只自開

河漢西流斗柄橫  
爐烟飛動月華清  
陽春不恨無人和  
靜裏歌來只自聽

山疊崔嵬水渺茫  
故人萬里未相忘  
飄零更惜天邊雁  
獨駕秋風不入境

孤城寒角噎南樓  
黃葉關山過雁秋  
憶起滹沱相別處  
一窗風雨夢西州

軒外天桃手自栽  
卧看花落與花開  
有人來問西來意  
笑指蒼松惹綠苔

堂上笙歌醉耳聽  
牡丹香散一簾風  
謝家鸚鵡金籠裏  
笑殺池邊綠鬢翁  
半生鞍馬逐風塵  
鏡裏流年白髮新  
自是功名有歸處  
等閑不肯逐閑人

讀遺山詩十首

劍氣從教犯斗牛  
百川橫放海難收  
九天直上無疑滯  
更看銀河一派流  
鶴揚清淚過華亭  
銀漢無聲轉玉繩  
夢斷一軒明月在  
令人心似玉壺冰  
編排一字有高卑  
就者功夫作者知  
自古文章貴辭達  
蘇黃意不在新奇

公論元無擅否臧  
過情聲聞可承當  
杜詩韓筆難書字  
不待人言自發揚

北里笙歌勸酒杯  
南隣門巷冷如灰  
秋風萬里方搖落  
叫殺孤鴻春不回

青雲高興入冥搜  
一字非工未肯休  
直到雪消冰泮後  
百川春水自東流

情發聲調節作文  
溫柔敦厚見詩真  
離騷九變能堪尚  
屈宋前頭更有人

兩岸桃花夾醉鄉  
春江渺渺月茫茫  
諸仙詩思難籠罩  
仰羨雲霄孤鳳凰

秋風夜雨布衣單  
破屋猶憂天下寒  
不料世人多莽鹵

久教吾道屬艱難

雲霞閃爍動霓旌  
轟磕征輦震地聲  
千里折衝歸指畫  
將壇孫子獨論兵

三月

背陰花木錦成叢  
幽谷鶯啼上苑中  
李白桃紅楊柳綠  
天涯無處不春風

續山谷焚香

險心萬仞畫冥冥  
躁欲紛紛動五兵  
誰會焚香黃魯直  
出門一笑大江橫

癡坐

青春緣底忙忙去  
白髮無端續續生  
自笑行藏多錯料  
却將癡坐學忘情

淡中

瀟瀟洒洒水雲鄉  
擾擾膠膠名利場  
世味覺來真嚼蠟  
淡中服過味如糖

夏夜

天星不見黑雲垂  
一夜轟雷雨雪飛  
睡起陰雲寒果烈  
夏衣猶自是冬衣

夢回

心上無塵世上仙  
北軒高挂日常眠  
正當午夢醒時節  
竹裏棋聲到枕邊

春思

江梅零落玉枝空  
草草花花上苑中  
桃李不言春不管  
綠情紅思滿春風

留燕

啣泥舊燕壘新巢  
來往如辭曲折勞  
蝸舍雖微足容爾  
畫梁爭得幾多高

暮春

百花眼底亂飄零  
綠柳池塘草又生  
絕色海棠春也妬  
況他風雨本無情

齋中

閑來常把自心平  
寸地人間萬事萌  
好惡自先欺不得  
休論暗室有神明

為宋義甫言書三首

轉腕不圓馬解草  
立毫未正謾為真  
須因規矩忘規矩  
才得縱橫似古人  
書法晉人多得妙  
右軍筆陣獨縱橫  
鵝頭轉處無凝滯  
一段風流老更成

張君筆法入神趣  
顛草翻藏古篆風  
枯樹晚鴉棲未遍  
忽看雲海起羣鴻

感興九首

干羽無由息戰爭  
讀書空有未忘情  
蕭然獨坐空虛裏  
安得人心自太平  
人間萬事不能周  
自省無虧豈有憂  
聞道春風和氣裏

大家都好展眉頭  
殘星落盡東方明  
夜氣消沉萬事生  
誰信道人心似水  
無時無節不澄清  
敬防暴慢禮防身  
橫逆來加莫要嗔  
萬物分明備於我  
儻能克己自歸仁

河橫斗轉三更夜  
秋月亭亭影未斜  
一段光明如許大  
等閑休遣亂雲遮

百年身世寄蘧廬  
萬事無心自破除  
一炷古香清靄裏  
靜來重展案頭書

善無不顯惡難藏  
天網恢恢有弛張  
牙齒落殘舌尚在  
誰知柔弱勝剛強

元精不逐物虛盈  
天地誰能踐此形  
萬物凋枯歲寒後  
庭前松柏只青青

周流元氣不曾停  
晝夜相推有晦明  
一屈一伸天地理  
銀蟾西沒日東生

歸來

鞍馬生平談笑間  
歸來贏得鬢毛斑  
紅塵只在南窗外  
收得身心一榻閑

春曉

海棠微露濕胭脂  
楊柳輕風弄碧絲  
一片春光都是恨  
佳人睡起倚樓時

秋望

白沙汀渚近漁村  
蘋蓼花邊鷗鷺群  
老鶴得秋猶勁健  
九臯飛起入青雲

過田家

柳映長堤水浸沙  
夏初騎馬過田家  
鳴鳩喚住西山雨  
桑葉如雲麥始花

春望

濛濛小雨浥芳塵  
一片花光眼底新  
山色隔煙無忽有  
故教凝佇倚樓人

山洞桃花

山村路僻客來稀  
紅杏梢頭挂酒旗  
洞裏桃花人不見  
春心春色只春知

新開牡丹

四月新來三月還  
一春光景鏡中看  
東風也逐情濃處  
吹落桃花放牡丹

雨過登樓

錦里春光曉望中  
雨餘花潤草蒙茸  
青山尚在浮烟裏  
樓上分明見幾峰

宮中曲

簾捲東風戶半開  
閑處煙鎖綠紋苔  
海棠花上黃昏月  
曾照金鸞幾度來

駝車行

駝頂丁當響巨鈴  
萬車軋軋一齊鳴  
當年不離沙陀地



輟斷金原鼓笛聲

送竇先生因所借陶詩為贖

養老須開十頃地求凰應長九苞兒莫遠兩冊淵明集  
便當今朝送別詩

小溪

小溪流水碧如油終日忘機羨白鷗兩岸桃花春色裏  
可能容箇釣魚舟

憶遂通長老三首

年來癡坐百無為絕體玄微却自微此意塞鴻傳不到  
黃爐青縷謾南飛

去年抵枕過三冬別後關河遠萬重桃李多花易零落  
青青羨殺歲寒松

一半佳山未見分平生行止不堪云又逢明月當三五  
滿眼清光似對君

為大覺中言詩四首

水平忽有驚人浪蓋是因風擊起來造語若能知此意  
不須特地騁奇才

七情六義一心中言語還因感處通李杜蘇黃無二律  
後生徒苦立家風

清雄騷雅因題賦古律篇章逐變生一字莫教無下落  
有情還似不能情

四時迭運方成歲萬物交參乃是文須信乾坤當肅靜

龍吟虎嘯自風雲

晚眺

長歌短詠流年裏  
遠眺登高夕照邊  
不見南山真面目  
一川秋水淡林烟

晴望

樓頭凝眺倚晴暉  
山勢長林水附堤  
燕子雙雙啣不遍  
鳳凰城裏落花泥

期飲

天上日迴牛女度  
人間春滿鳳凰城  
謫仙不飲盃中醪  
閑殺花前好月明

溪上

蘆花遠映釣魚行  
漁笛時聞三兩聲  
一陣西風吹雨散  
夕陽還在水邊明

春睡

桃李爭開眼倦開  
十分春睡若嬰孩  
每於濃處嗔人喚  
恐礙周公入夢來

訪處士不遇二首

山水分明圖畫展  
烟霞散盡洞湖開  
何須更見幽人面  
覽此疑從浪苑來  
漁舟散去釣綸收  
一片殘陽在樹頭  
誰與騷人消遠思  
倚樓獨自看川流

山林

鍾鼎於人殊不惡山林在我固當然東風掃靜庭前雪  
芳草青青又一年

年來

本存實志閑終老却被虛名誤半生甚喜年來得書看  
小齋清洒紙窗明

行中小憩

水邊下馬憩○從者相催急又趨自笑不如灘上鳥  
飛來飛去只由渠

寄中山乾明寺主

十年朔漠走風塵今日乾明伴水雲長老周旋待賓客  
僧中也有孟嘗君

寄長安友人

梧桐葉盡菊花殘賴有青松保歲寒騷客題詩滿河朔  
可無一句到長安

詠海印居士幽居四首

東西院映千竿竹南北池開萬朵蓮人在丹青圖畫上  
不勞雲海覓神仙

草枯不整登山屐蓮盡空閑泛水舟旋撥瓮頭新熟酒  
淵明醉倒菊花秋

嚴冬無色物歸根凍柳枯荷各任真紅翠許多何處去  
翁言今已屬藏春

春日鶯啼綠楊樹夏天人賞白蓮花請君試自南頭數

城市山林第一家

清明後一日過懷來

居庸春色限燕臺山杏凝寒花未開驛馬蕭蕭雲日晚  
一川風雨過懷來

近詩

詩如雜劇要鋪陳遠自生疎近自新本欲出場無好絕  
等閑章句笑翻人

魯連不受賞

魯連談笑却三軍玉壁冰壺不受塵一葉扁舟滄海闊  
千金留與市塵人

諸葛親細務

中持大體取英豪邊幅紛紛有六曹萬里經綸談笑了  
區區蜀國豈須勞

卧龍廬

風雨南陽一草廬不知容得幾江湖九層淵底驪龍睡  
任有人窺領下珠

赤壁故事

三分漢鼎勢全張未悟曹公獨渺茫赤壁風濤千載後  
只教勲業屬周郎

讀洛神賦

八斗奇才筆力雄洛神一賦盡為功當時羅襪生塵處  
猶有波紋起細風

附書

千里家山八寸眸  
碧天無際月橫鉤  
書成待得秋風便  
一線微鴻獨倚樓

春深

新染薔薇一撲黃  
梨花亂舞白霓裳  
憑誰收拾春風去  
催發酴醾滿架香

馬上七夕二首

醉眠野鳥三呼起  
老雨西風一掃空  
馬上賦詩秋七夕  
碧天無際思無窮

香盤綵帳蛛絲網  
歲歲年年七夕同  
何處巧成樓上女  
玉鉤簾幕捲秋風

桃花曲

紅錦濯來一片新  
武陵溪上照青春  
世間都唱桃花曲  
誰是桃花洞裏人

桃花落

溪上天桃春已過  
劉郎漸老暮花何  
狂風向晚休生惡  
枝上殘紅苦不多

海棠曲

翠毫紅粧色正新  
精神占斷滿園春  
東風莫怪長耽睡  
喚得醒來更誤人

城西遊

昨朝信馬鳳城西  
鞭約垂楊過小堤  
春色滿園花勝錦

黃鸝只揀好枝啼

月宮謠

洞裏桃花不獨春  
劉郎纔去阮郎新  
廣寒宮裏姮娥住  
空惜娉婷不嫁人

紅葉流

霜落嚴秋錦樹空  
瑣窗幽思滿西風  
金河本是無情水  
流出宮中一葉紅

倚樓吟

獨上高樓晚不歸  
碧空望斷雁猶飛  
欄干十二無處  
靜倚東軒待月輝

征西回

春回三月過西州  
芳草青青不斷頭  
多少凍溪凝住水  
盡隨歸客向東流

詠關雎

佳人窈窕花難比  
才子溫和玉不如  
紅日轉西家事緩  
碧紗窗下詠關雎

鴉鳩詞

春風吹起樹頭鳴  
叫散浮雲日色晴  
呼婦歸來鵲巢裏  
鴉鳩元不解謀生

遠別離

霜落催寒鴻雁稀  
倚樓人定怨歸遲  
笛聲喚起山頭月  
飛上青天照別離

睡蝴蝶

芳草連山翠萬重天涯何處不春風玉蝴蝶在深花裏  
想與莊周夢不同

憶友

禁漏遲遲夜未分對牀清話不生塵別來幾度西窗下  
風雨蕭蕭憶故人

客館

客館蕭條動客情飛螢箇箇傍窗明樓頭鼓角風吹斷  
漏下銀壺第一聲

春始來

三月南州草木長落花飛絮滿池塘東君也惜天涯客  
盡放春光過界牆

禪頌十首

如來妙法離文字萬語千言何處歸鹿苑祇園空浩浩  
回頭四十九年非  
頂園肩袒眼中花老大維摩不出家玉鏡金針休補綴  
十方世界一袈裟  
鏡中影像元非我石上精神却是誰落盡桃花春不管  
枝頭青子自纍纍

衲子家風不外求何須苦闢快龍舟許來大小如來藏  
豎得俱祇一指頭

見色明心方是暗聞聲悟道轉為遲斷頭船子無牽纜

自在滄浪東復西

驢頭馬面誰分別  
鵬嘴魚腮孰忖量  
諱却舊名人不識  
長沙元是謝三郎

禪榻夢回三丈日  
香爐烟裊一絲風  
東家喃喃西家默  
都在如來大藏中

彌棹乍離楊柳岸  
策筇又過杏花村  
水聲禽語相和應  
說盡觀音不二門

春風展葉橋頭柳  
臘月開花水畔梅  
萬事隨緣真省力  
何須心地冷如灰

朝雲暮月齋簷低  
春水秋山拄杖邊  
自任閑行與閑坐  
年來志盡祖師禪

古燕感懷

虎擲風拏感壯懷  
英雄遺恨化塵埃  
燕山依舊青如染  
佇望黃金布隗臺

焚勝梅香

春風吹滅小檠缺  
夢斷爐香結翠幢  
簷外杏花橫素月  
恰在梅影在西窗

薔薇

謾與東風作主人  
栽培花草伴閑身  
不辭接竹成高架  
收拾薔薇一片春

洛川

洛川東去幾時歸  
漾漾清流照翠微  
日暖雪消沙岸軟



鴛鴦相對不驚飛

宿寒山寺

樓上鳴鐘報五更  
朦朧深殿佛燈明  
更無幽夢隨寒枕  
聽徹松風到岸聲

溪上

溪上映人楊柳黃  
滿溪流水碧泱泱  
憑君莫向溪南望  
春草春風能斷腸

素帳

山為屏帳草為茵  
車馬縱橫動塞塵  
過客遠看霜一點  
豈知中有讀書人

亭帳

草色如波照碧空  
新開一朵玉芙蓉  
雄風吹斷襄王夢  
高捲巫山十二峯

馬鬣

青樓歌酒少年郎  
費盡千金笑一場  
玉釀飲來甘似醴  
羨伊不肯使人強

聞笳

霜天月夜雁南歸  
塞上誰將捲葉吹  
莫逐西風聲斷續  
天涯遠客不勝悲

鳳

來儀之日賀清朝  
一返丹山信息遙  
倘使而今有歸意  
誰能復奏九簫韶

鵬

擊水三千雲翼垂搏風九萬赴天池蓬蒿斥鷃休相笑  
我志應非爾所知

鶴

朱頂烏裳白羽衣新從蓬島侶雲歸千年只合巢松上  
花柳從他鶯燕飛

雁

離離萬里徹天涯兩翅搏風送落霞秋往南來春往北  
到頭何處是真家

子規

化禽原是帝王身萬里飛來逼暮春塵路盡奔名利客  
苦啼歸去勸何人

鳩

但得安身不苦羅幾莖紫草便為窠雖然我拙君休笑  
技巧何須費力多

鶯

兩翅翩翩金縷輕年年出谷話春晴嬌聲引得東君媚  
倚翠偎紅過一生

燕

鷓鴣家本在烏衣二社相催東復西但得梁間舊巢在  
莫於簾外苦爭泥

蜂

雖成羣隊鬧相將聽命成功亦有王蜜就可為人世用  
尋思不枉為他忙

蝶

穿花度柳傍樓臺弄日縈風舞翅開且得我無莊氏夢  
任君飛去又飛來

獵騎

三驅長是失前禽四合應難免上林坐不垂堂太驕情  
國家何啻有千金

聞雁

已層嘹唳逐春風又到秋來叫碧空為問人生有何事  
飄零長在此聲中

芳草

平蕪一望遠山遮午後醒來紅日斜莫為迢迢怨離別  
小戎非是七香車

遠山

仙娥初試鏡中~~面~~左翠微濃右翠長應是無人愛平淡  
不須重問畫眉郎

秋月

夢回殘影來窗上日落晴光墮馬前圓鏡可將方鏡比  
照來照去已三年

東勝道中

天荒地老物消磨贏得詩人感慨多兩鬢黃塵秋色裏

又投東勝過黃河

讀易

人常與易不相離着意求言轉見疑動靜既萌爻象具  
此情明得是著龜

學道

收心學道造精微急着工夫已有遲寬過誰如遽伯玉  
回頭四十九年非

偶得

人之有善與誰行不善休忘教誨情責備百中無一二  
聰明都是不聰明

夜雨

接地陰雲晚不開故鄉歸夢到邢臺枕邊忽聽雷聲起  
風雨縱縱一潑來

碁

棋盤十九路縱橫百着皆從一着生黑白自將心有亂  
不如袖手看輸贏

寄溫子玉

聰明天賦不能求求得聰明一世愁留得三分不曉事  
禪房深處咽饅頭

桃枝曲

一色桃花十里春劉郎見日尚精神東風吹入西家去  
猶寄芳心憶故人

國立中央圖書館, NATIONAL CENTRAL LIBRARY, TAIWAN, R.O.C.

劉太傅藏春集卷第四



國家圖書館, NATIONAL CENTRAL LIBRARY, TAIWAN, R.O.C.

劉太傅藏春集卷第五

樂府

木蘭花慢

到閑人閑處更何必問窮通但遣興哦詩洗心觀易散  
步攜筇浮雲不堪攀慕看長空澹澹沒孤鴻今古漁樵  
話裏江山水墨圖中千年事業一朝空春夢曉聞鐘得  
史筆標名雲臺畫像多少成功歸來富春山下笑狂奴  
何事做三公塵事休隨夜雨扁舟好待秋風

二

既天生萬物自隨分有安排看鷺鷥雲霄驂騮道路斥  
鷃蒿萊東君更相料理着春風吹處百花開戰馬頻投

北望賓鴻又自南來紫垣星月隔塵埃千載拆中台歎  
麟出非時鳳歸何日草滿金臺江山閱人多矣計古來  
英物總沉埋鏡裏不堪看鬢樽前且好開懷

三

笑平生活計渺浮海一虛舟任紫塞風沙烏鬢瘴霧即  
處林丘天地幾番朝暮問夕陽無語水東流白首王家  
少年夢魂正繞揚州鳳城歌舞酒家樓肯管世間愁奈  
糜鹿疎情烟霞痼疾難與同遊桃花為春憔悴念劉郎  
雙賓也成秋舊事十年夜雨不堪重到心頭

### 風流子

書帙省淹留人間事一笑不須愁紅日半窗夢隨胡蝶  
碧雲千里歸驟驂酒杯裏功名渾瑣瑣今古兩悠悠  
漢代典刑蕭曹畫一晉朝人物王謝風流冠蓋照神州  
春風弄絲竹勝處追遊詩興筆搖牙管字字銀鈎遇美  
景良辰尋芳上苑賞心樂事取醉南樓好在五湖烟浪  
誰識歸舟

### 永遇樂

山谷家風蕭閑情味只君能識會友論文哦詩遣興此  
樂誰消得室中天地目前今古今日還明日似南華蝶  
夢醒來秋雨數聲殘滴詩書有味功名應小雲散碧空  
幽寂北海洪樽南山佳氣清賞今猶昔一天明月幾行  
征雁樓上有人橫笛想醉中八表神遊不勞鳳翼

望月婆羅門引

午眠正美覺來風雨滿紅樓捲簾情思悠悠望斷碧波  
煙渚蘋蓼不勝秋但冥冥天際難識歸舟大夫骨朽筭  
空把汨羅投誰辨濁涇清渭一任東流而今不醉苦一  
日醒醒一日愁薄薄酒且放眉頭

二

年來懶看古今文字紙千張酒中悟得天常閑殺堦前  
好月不肯照西廂任昏昏一醉石枕藤簾名途利場物  
與我兩相忘目斷霜天鴻雁沙漠牛羊一庭秋草教粉  
蝶黃蜂自任忙花老也尚有餘香

洞仙歌

倉陳五斗價重珠千斛陶令家貧苦無畜倦折腰閭里  
棄印歸來門外柳春至無言綠山明水秀清勝宜茅屋  
二頃田園一生足樂琴書雅意無箇事卧看北窗松竹  
忽清風吹夢破鴻荒愛滿院秋香數叢黃菊

江城子

平生行止賴編排住蒿萊走塵埃社燕秋鴻年去復年  
來看盡好花春睡穩紅與紫任他開紫微天上列三台  
問英才幾沉埋滄海遺珠當着在鸞臺與世浮沉惟醉  
可如有酒且開懷

二遊瓊華島

瓊華昔日賀新成與蒼生樂昇平西望長山東顧限滄



溟翠輦不來人換世天上月自虛盈樹分殘照水邊明  
雨初晴氣還清醉却興亡惟有酒多情收取晉人腮上  
淚千載後幾新亭

三

松蒼竹翠歲寒天雁山前鳳城邊回首燕南一別又三  
年長愛故人心似月人不見月還圓小窗寂寂鎖凝烟  
一燈然一詩聯詩苦燈青孤影伴無眠明日酒中餘思  
在揮醉墨洒雲笺

三真子

念我行藏有命烟水無涯嗟去雁羨歸鴉半生人累影  
一事懸簪生華東山客西蜀道且還家壺中日月洞裏烟  
霞春不老景長嘉功名眉上鎖富貴眼前花三杯酒一  
覺睡一甌茶

玉樓春

閑雲不肯狂馳騁向晚自來棲岳頂野人無事也關門  
一炷古香焚小鼎驚鳥有恨無人省飛去飛來明月影  
夜闌萬籟寂中聞破牖透風微覺冷

二

翠微掩映農家住水滿玉溪花滿樹青山隨我入門來  
黃鳥背人穿竹去烟霞隔斷紅塵路試問功名知此趣  
一壺春酒醉春風便是太平無事處

臨江山

同是天涯流落客君還先到襄城雲南關險夢猶驚曾  
記明月底高枕遠江聲年去年來人漸老不堪苦思功  
名傾開懷抱酒多情幾時同一醉揮手謝公卿

二

滿路紅塵飛不去春風弄我華顛故園桃李酒樽前賞  
心逢美景此事古難全若智若癡人總笑夕陽空裊吟  
鞭馬頭山色翠相連不知山下客何日是歸年

三

堂上簫韶人不奏鳳凰何處飛鳴黃塵擾擾馬縱橫誰  
能知樂毅志不在齊城後輩謾搜前輩錯到頭義重功  
輕海隅四面盡蒼生東風吹綠草布谷勸春耕

四梨花

冰雪肌膚香韻細月明獨倚闌干遊絲縈惹宿烟環東  
風吹不散應為護輕寒素質不宜添彩色定知造物非  
慳杏花才思入凋殘玉容春寂寞休向雨中看

五桃花

一別仙源無覓處劉郎鬢欲成絲蘭昌千樹碧參差芳  
心應好在時復問蜂兒報到洞門長閉着只今未有開  
時杏花容冶没人司東家深院宇牆外有橫枝

六海棠

十日狂風才是定滿園桃李紛紛黃蜂粉蝶莫生嗔海  
棠貪睡着留得一枝春便是徐熙相對染丹青不到天

真雨餘紅色愈精神夜眠清早起應有惜花人

小重山

詩酒休驚誤一生黃塵南北路幾功名枝頭烏鵲夢頻驚西州月夜夜照人明枕上數寒更西風殘漏滴兩三聲客中新感故園情音書斷天曉雁孤鳴

二

雲去風來雨乍晴斷烟分遠樹夕陽明夕陽無處雁斜橫山重疊山外更人行千古短長亭別離渾是苦奈西征欲憑雙鯉寄幽情東風水幾日到襄城

三

曉起清愁酒盞空清愁緣底事別離中登臨無地與君同青山色山外更重重落盡海棠紅薔薇新破萼露華濃牡丹方信一簾風尋幽夢曾到小園東

四

漠北雲南路九千舊年鞍上馬又新年玉梅寂寞老江邊東風軟楊柳得春先斜月照吟鞭可人難似月缺還圓桃花流水杏花天歡娛地誰闌酒樽前

五

一片殘陽樹上明百禽爭啅噪雨初晴西風鴻雁落沙汀歸舟遠漁笛兩三聲烟草逐人行前山青未了後山橫山川人物闌崢嶸黃塵路鞍馬笑平生

江月晃重山

芳草洲前道路夕陽樓上欄干碧雲何處望歸鞍從軍  
客耽樂不思還洞裏仙人種玉江邊焚客滋蘭鴛鴦沙  
暖鵲鴝寒菱花鏡不奈鬢毛班

二

杜宇聲中去住蝸牛角上輸贏金甌名字儘人爭秋鴻  
影湖水鏡般明楊柳烟凝露重蓮花月冷風清萬年枝  
穩鵲休驚隣家笛夜夜故園情

三

太白詩成對酒仲宣賦就登樓思鄉懷古兩悠悠黃塵  
路風雨鬢驚秋三島雲隨鶴馭五湖月載歸舟青山西  
塞水東流功名好歡伯笑人愁

四

紅雨斜斜作陣綠雲碎碎成堆武陵溪口幾人迷桃花  
流水入不流迴夏日薰風殿閣秋宵寶月樓臺仙凡境  
界隔塵埃青鸞客歸去又歸來

南鄉子

南北短長亭行路無情客有情年去年來鞍上馬何成  
短鬢垂垂雪幾莖孤舍一檠燈夜夜看書夜夜明窗外  
幾竿君子竹淒清時作西風散雨聲

二

翠袖捧離觴濟楚兒郎窈窕娘別曲一聲雙淚落悲涼  
縱不關情也斷腸今古利名忙誰信長安道路長昔日

去家年正少還鄉故國驚嗟兩鬢霜

三

憔悴寄西州賦得登樓懶上樓  
魂夢不知關塞遠悠悠  
疎雨梧桐客裏秋往事起新愁  
九曲迴腸不自由見說  
世間離別苦休休一夜相思白了頭

四

遊子繞天涯才離蠻烟烟塞沙  
歲歲年年寒食裏無家  
尚惜飄零看落花閑客卧烟霞  
應笑勞生鬢早華驚破  
石泉槐火夢啼鴉掃地焚香自煮茶

五

李杜放詩豪萬丈晴虹吸海濤  
六義不傳風雅變離騷  
金玉無言價自高春日對春醪  
短詠長歌慰寂寥幽鳥  
落來花裏語從教彩鳳飄飄上九霄

六

季子解縱橫六印纍纍拜上卿  
鳳鳥不來人漸老謀生  
二頃田園也易成樽酒醉淵明  
菊有幽香竹有聲吹破  
北窗千古夢風清小鳥喧啾噪曉晴

七

夜戶喜涼颼秋入關山暑氣消  
勾引客情緣底物鷓鴣  
落日淒清叫樹梢古寺漏長宵  
一點青燈照寂寥暮雨  
夜深猶未住芭蕉殘葉蕭疎不奈敲

八

檀板稱歌喉唱到消魂韻轉幽便覺絲簧難比似風流  
一串驪珠不斷頭惟酒可忘憂况復虛家有莫愁醉倒  
不知天早曉雲收花影侵窗月滿樓

鷓鴣天

垂柳風邊拂萬絲春光照眼惜花枝鳳城好景誰來賞  
忙殺悠悠世上兒歌近耳酒盈卮十分勸飲却推辭人  
生休聽漁家曲一日風波十二時

二

酒酌花開對月明醒中醉了醉中醒無花無酒仍無月  
愁殺耽詩杜少陵三品貴一時名衆人爭處不須爭流  
行坎止何憂喜笑泣窮途阮步兵

三

花滿樽前酒滿卮不開笑口是癡兒山林鐘鼎都休問  
且聽雙蛾合一詞春爛處夜晴時玉壺春雪冷胭脂海  
棠影轉梧桐月吟到梨花第一枝

四

清夜哦詩對月明詩魂偏向月邊清欲成小夢還驚破  
無奈洋河聒枕聲紅日曉碧天晴風沙撲面過雞鳴灤  
陽川裏魚龍混四海青山拱一城

五

水滿清溪月滿樓客懷須賴酒消愁風迴玉宇三更夜  
露滴金莖八月秋情脉脉思悠悠星河織女隔牽牛乘

槎欲把仙郎問也似浮生有白頭

六

柳映清溪漾玉流  
石榴開罷芰荷秋  
一聲漁笛烟波上  
宜着蓑翁泛小舟  
紅蓼岸白蘋洲  
閑鷗閑鷺更優游  
斜陽影裏山偏好  
獨倚闌干懶下樓

七

殘月低簷挂玉鉤  
東風簾幙思如秋  
夢魂不被楊花攪  
池面還添翠壓稠  
紅叱撥翠驂騮  
青山隱隱水悠悠  
行人更在青山外  
不許朝朝不上樓

太常引

長安三唱曉雞聲  
誰不被利名驚  
攬鏡照星星  
都老却  
當年後生  
山林蒼翠  
江湖烟景  
歸去没人爭  
林望濯塵纓  
幾時得滄浪水清

二

衲衣藤杖是吾緣  
好歸去舊林泉  
富貴任爭先  
總不較  
諸公著鞭  
雁飛汾陽  
鶴歸華表  
人事又千年  
滄海變桑田  
誰知有壺中洞天

三

青山憔悴瑣寒雲  
站路上最傷神  
破帽鬢沾塵  
更誰是  
陽關故人  
頰波世道  
浮雲交態  
一日一番新  
無地覓松筠  
看草青紅闌芳春

四

桃花流水鯀魚肥青筠笠綠蓑衣風雨不須歸管甚做  
人間是非兩肩雲袖一枝筇因畫日忘機之子欲何為  
快去來山猿怪遲

五魯仲連

當時六國怯強秦使群策日紛紛談笑却三軍筭自古  
誰如此君一心忠義滿懷水雪功就便抽身富貴若浮  
雲本是箇江湖散人

六武侯

至人視有一如無見義處便相扶三顧出茅廬莫不是  
先生有圖拯危當世覺民斯道佩玉已心枯遺恨失吞  
吳真箇是男兒丈夫

秦樓月

杯休側為君送別城南陌城南陌茸茸芳草萬家春色  
陽關一曲愁腸結吟鞭斜裊黃昏月長安古道洛陽遊  
客

二

斜陽暮西風落葉關山路歸鴻巢鷺笑人來去我歌一  
曲君聽取人生聚散如今古如今古湘江秋水渭川春  
樹

三

調羹手殘枝莫折離亭柳年年春盡為誰消瘦海棠過  
雨愁紅皺行人駐馬空搔首空搔首秦樓花月鳳城



酒

踏莎行

白日無停青山有暮功名兩字將人誤  
福懷先着酒澆  
開放心又被書收住一味閑情十分幽趣  
夢哦芳草池塘句東風吹徹滿城花無人曾見春來處

二

碧水東流白雲西去旌旗捲盡西山雨  
淡烟寒露月黃昏傷懷又似別來處  
雙眼增明青山如故故人怪我來  
何暮征鞞聲震五更風夢魂驚散無蹤緒

訴衷情

山河縈帶九州橫深谷幾為陵  
千年萬年興廢花月洛陽城  
圖富貴論功名我無能一壺春酒數首新詩實訴衷情

謁金門

春寒薄睡起宿醒生惡枕上家山都夢却  
東風吹月落留客定知西閣有酒與誰同  
酌別手臨歧曾記握君心真可託

二

醪雖薄再四勸君無惡杯到面前須飲却  
鶯啼花未落東置功名高閣兩日三朝留酌  
綠柳來年無可握春情憑感託

好事近

桃李盡飄零風雨更休懷惡細把牡丹遮護怕因風吹  
落平蕪望斷更青山樓外數峯削野鳥不知歸處把行  
雲隨着

二

酒醒夢回時小鼎串烟初滅留得瘦梅疎竹弄窗間風  
月起來幽緒轉清幽幽處更難說一曲竹枝歌罷滿脣  
懷冰雪

清平樂

月明風勁花弄窗間影一夜玉壺秋水冷梧葉乍凋金  
井世間日月如梭人生會少離多籬畔黃花開盡相逢  
不醉如何

二

夜來霜重簾外寒風動橫笛樓頭才一弄驚破綠窗幽  
夢起來情緒如何開門月色猶多照我如常如舊更誰  
能似姮娥

三

漁舟橫渡雲淡西山暮岸草汀花誰作主狼籍一江秋  
雨隨身蓑笠蓑衣斜風細雨休歸自任飛來飛去伴他  
鷗鷺忘機

四

彩雲盤結何處歌聲噎歌罷彩雲歸絳闕棹下堦前明  
月月華千古分明照人一似無情不道天涯離客夢回

愁對三更

卜算子

曉角纔初弄，驚覺幽人夢。珠壓花梢的的圓，春露昨宵重。小鼎香浮動，閑把新詩誦。坐客同嘗碧月團，擘破雙飛鳳。

浣溪沙

桃李無言一徑深，客愁春恨莫相尋。看花酌酒且開襟。白雪浩歌真快意，朱絃索絕有知音。月明千里故人心。

朝中惜贈章仲一

衣冠零落暮春花，飄捲滿天涯。好把中原麟鳳網，來祥瑞皇家。白雲丹嶂清泉綠，樹幾換年華。認取隨時達節，莫教繫定匏瓜。

桃花曲

一川芳景一壺春，酒一襟。幽緒今朝好，春色又無風。無雨水滿清溪，花滿樹，有閑鷗。伴人來去，行雲望逾遠，更青山無數。

二

青山千里滄波，千里白雲千里行程。問行客更無窮，山水青史功名都半紙。念劉郎鬢先如此，桃源覓無路對溪花紅紫。

三

茸茸芳草漫漫長路，忽忽行李佳人在何許。眇雲山千

里莫惜千金沽一醉道劉郎不宜憔悴春歸寂寞語恨  
桃花流水

點絳脣

十載風霜玉關紫塞都遊遍驛途方遠夜雨留孤館燈  
火青熒莫把吳鉤看歌聲軟酒斟宜淺三盞清愁散

二

古寺蕭條十年再到經行路舊題新句總是關心處睡  
起西軒轉覺添幽趣斜陽暮淡烟疎雨濕遍山前樹

三

客夢初驚雪晴風冷千山曉塞烟沙草又上郵亭道石  
室蘿龕為我君應掃何時到放懷吟嘯相伴山間老

四

寂寂朱簾鳳樓人去簫聲住斷腸詩句彩筆無題處花  
褪殘紅綠滿西城樹衡臯暮客愁何許梅子黃時雨

五

天上春來滿前芳草迷歸路楚山湘浦朝暮誰雲雨風  
吹初聽認是吹簫侶劉郎去碧桃千樹世外無尋處

六梨花

立盡黃昏鞦韆塵不到凌波處雪香凝樹懶作陽臺雨一  
水相懸脉脉難為語情何許向人如訴寂寞臨江渚

七梅

策杖尋芳小溪深雪前村路暗香時度更在清幽處一

見水容便有西湖趣題新句句成梅許折得南枝去

八

恰破黃昏一灣新月梅稍共玉溪流  
水時有香浮動別後清風馥郁添  
多種如相送未忘珍重已入幽人夢

桃源憶故人

桃花亂落如紅雨閃下西城碧樹  
寂寞瑣窗朱戶最是春深處一樽  
酒盡青山暮樓外輕雲猶度遠水  
悠悠不住流得年光去

劉太傅藏春集卷第五

劉太傅藏春集卷第六

附錄

拜光祿大夫太保參領中書省事制

長生天氣力裏

皇帝聖旨咨爾劉秉忠氣剛以直學富而文雖晦迹於空門每潛心於聖道朕居藩邸卿實賓僚側聞高誼餘三十年出從遐方幾數萬里迨予嗣服須汝計安不先正名何以壓衆宜從師位兼總政機可特授光祿大夫太保參領中書省事卿其勉輔朕躬率先乃屬察朝夕之勤惰審議論之是非凡有施為並聽裁決仁觀成績別示寵章准此

中統五年八月 日

贈儀同三司太傅謚文貞制

長生天氣力裏  
大福廕護助裏

皇帝聖旨臣以忠孝而事上貴輸獻納之誠上以禮義而過臣思篤始終之愛視死之日猶生之年故先祿大夫太保劉秉忠學窺天人識貫今古邃冲而有守安靜而無華昔侍潛藩稔聞高論適當三接之際懇上萬言之書益將舉天下而措諸安以戒為人主者果於殺朕嗣服而伊始卿盡力以居多蓋得卿寔契於朕心而獨朕悉知於卿意事皆有驗人匪他求周旋三十年不避其難剴切數百奏各中其理共成庶政方圖任於舊人誰謂昊天不憖遺於一老興言及此何日忘之載惟台輔之尊厥有泉扃之賁是用錫之綸命峻一品之華階襚以袞衣躡三槐之正位復加顯號允答殊勲惟爾英靈識予哀寵可贈儀同三司太傅謚文貞准此

至元十二月正月 日

行狀

故先祿大夫太保贈太傅儀同三司謚文貞劉公  
行狀

資政大夫中書左丞張文謙奉 勅撰

公諱侃更名秉忠字仲晦自號曰藏春其先仕遼為當

時大族世居瑞州之劉李村一門之內居顯列者甚衆  
金初公之曾祖襲世業累遷邢州節度副使丁母憂復  
還瑞州留一子於邢名澤即公之祖也因而家焉為人  
個儻有大志鄉里甚畏重之娶邢臺張氏女生一子名  
潤即公之父也通音律慈祥長者與物無忤庚辰歲天  
兵南下太師國王經略河朔邢遂舉以降留官鎮守以  
草昧之際聽便宜行事遂立都元帥府衆推潤為副都  
統尋陞都統事定之後署本郡錄事為政寬簡不立威  
嚴凡民有鬪訟者既伏其罪則必以善言教戒而遣之  
終不忍鞭朴也時西山諸堡寨朱附寇盜充斥錄事公  
時或暮夜醉歸雖兇惡輩必相與扶送至家而去累任  
鉅鹿內丘提領又以寬仁得衆心年甫六旬村居不仕  
生二子長即太保公也次曰秉恕公生而秀異丰骨不  
凡在嬉戲中便為群兒所推長或舉之為帥或拜之為  
師居然受之不疑隨即教令揮斥之性剛而有斷非理  
不屈於人母馬氏嚴整有法度凡起居飲食必責公以  
正理不為姑息之愛八歲入學誦書為諸生稱首年十  
三以父為錄事為質於元帥府元帥一見即云此兒骨  
相非常他日必貴命僚佐教之文藝不使列質子班置  
之幕司公遂立志為學詩文字畫與日俱進同輩生莫  
得窺其涯際也年十七節使趙公引置幕下甚愛重之  
時方在貧乏中一介不以取諸人好賢樂善而居常裕



如也丙申歲丁母憂毀瘠骨立疏食水飲哀思無窮恒  
衣一綿裘晝夜不解帶者三年見之者無不感歎也戊  
戌春遂決意逃避世事遜居於武安之清化遷滴水澗  
苦形骸甘澹泊宅心物外與全真道者居復欲西遊關  
陝天寧虛照老師聞之愛其才而不能舍遣弟子輩詣  
清化就為披剃與之俱來秋七月大蝗居人之乏食者  
十八九虛照老因妹婿之請就熟雲中挈公同往己亥  
秋虛照老還邢公因留住南堂講習天文陰陽三式諸  
書會海雲大士至一見奇其才時 上在藩邸遣使召  
海雲老北上因携公偕行既至見公洒落不凡及通陰陽  
天文之書甚喜海雲老南歸公遂見留自是禮遇漸隆  
因其 顧問之際遂闢用人之路暇中則讀書窮易講  
明聖人學丙午冬其父錄事公之哀聞至 上聞之召  
入溫言慰諭丁未春賻以黃金百兩遣使送還六月至  
邢州依通禮行素志冬十月葬祖父母及父母于邢臺  
之賈村戊申冬十二月 上遣使召公己酉春至 王  
府庚戌夏上萬言策所陳數十餘條皆尊 主庇民之  
事首言正朝廷振紀綱選相任賢安民固本執牘以奏  
上皆嘉納之甲寅秋 上征雲南以神武不殺之心  
所向克捷算無遺策其所全活者不可勝數公夙夜勤  
勞以副 上意未嘗少怠己未秋六軍渡江公潛贊神  
機孜孜匪懈一如雲南之行庚申春 上正位宸極召

公命之曰凡天下之大經養民之良法卿其議擬以奏  
公即上採祖宗舊典參以古制之宜於今者條列以  
聞深稱上意詔下之日網舉目張一時人材咸見  
錄用文物粲然一新先是上命有司擇上都南山之  
勝地營建庵舍而居公焉公號其山曰南屏中統五年  
秋八月改元至元翰林學士承旨王鶚奏公當正衣冠  
且白鶚嘗勸馬未之見許乞賜特旨以遂衆望詔  
從之以光祿太保叅領中書省事更名秉忠公既大拜  
報國之心益切上命公議建國號定都邑頒章服  
舉朝儀事無巨細有關時政之得失者公知無不言七  
年庚午上從諸臣之請遣禮部侍郎趙秉溫禮擇翰  
林侍講學士竇默之次女以配公竇氏賢而有文御下  
以寬車駕歲時行幸兩都公必隨之十一年夏居於上  
都南屏之精舍秋八月壬戌夜謂侍者皆退長歌至鷄  
鳴乃止質明侍者入即端坐而薨如假寐然顏色累日  
不變識者謂公坐脫也享年五十有九猶子蘭璋嗣焉  
上遣禮部侍郎知侍儀司事兼秘書少監趙秉溫擇  
以冬十月壬申葬於大都之西南凡所營葬之資一出  
於內帑十二年春正月詔贈太傅儀同三司文貞  
公帝曰朕惟秉忠始終逾三十年隨行跋涉雖祁寒  
暑雨未嘗有倦意而又言無隱避一皆出於忠誠其天  
文卜筮之精朕未嘗求於他人也此朕之所自知人皆

莫得與聞今其亡也了無遺恨特命學士王磐撰碑銘  
公博學無方明通而溥其勲業之著見於世昭昭然不  
可掩也論藝業則字畫出魯公筆法草書二王三昧發  
邵氏皇極之奧旨改前代已差之歷法得琴阮徽外之  
遺音至天文卜筮算數皆有成書無一不極其至詩章  
樂府又皆膾炙人口公之弟秉恕累任禮部侍郎順德  
安撫使彰德懷孟淄萊順天路總管其母張氏賦性勤  
儉篤於謹嚴公平生之嘉言善行播在天下者甚多姑  
錄已之所知者以道出處之大槩云至元乙亥春正月  
張文謙拭淚書

神道碑銘

故光祿大夫太保贈太傅儀同三司文貞劉公神  
道碑銘并序

翰林學士嘉議大夫知制誥兼修國史王磐奉  
勅撰

昭文館大學士正議大夫姚樞奉勅書

國信使所參議官高翺篆額

耕莘非求進之地而伊尹阿衡釣渭非巧宦之途而太  
公同載漢張良志從赤松而高祖得之以輔成帝業唐  
李泌幼好仙術而肅宗用之以佐定中興蓋天下之士  
惟自重者可與有為而輕進者必非令器是以古之明  
王取士不以悅媚易親者為可佳而以閑遠高潔難致

者為可貴。聖天子之用太保劉公，其審是道歟。公以高潔之資，慕空寂之教，輕富貴如浮雲，等功名於夢幻。曷嘗有一毫榮利之念動於心乎。聖天子邂逅一見，即挽而留之，待以心腹，契如魚水，深謀密畫，雖者宿貴，近不得與聞者，悉與公參決焉。此其精誠胥會志意交孚，與夫涓濱之同載，商邑之阿衡，蓋異世而同符矣。公諱秉忠，字仲晦，瑞州劉李村人。先世仕遼，多顯貴。金初，曾大父嘗任邢州節度副使，秩滿，身還鄉里，留其家於邢。故自公大父以下，遂為邢人焉。大父諱澤，資性倜儻，為鄉閭所重。父諱潤，仕本朝，歷邢州錄事、鉅鹿、內丘兩縣提領，俱有惠愛。公風骨秀異，志氣英爽，不羈家貧，年十七為邢臺節使府令史，以養其親。幹敏修潔，諸老吏咸服其能。一日因案牘事，有不愜意者，投筆嘆曰：「吾家奕世衣冠，今吾乃汨沒為刀筆吏乎！」丈夫不得志於世間，當求出世間事耳。即棄去，隱於武安山岩谷間，草衣木食，以求所志。天寧寺虛照禪師聞之，遣其徒招致，與披剃為僧。仍以公知經書，工翰墨，命掌書記。後遊雲中，住南臺寺，值海雲禪師被召北覲，過雲中，聞公博學多藝，能求相見。既見，約公俱行。公不可，海雲固要之，不得已遂行。既至謁，今上於潛邸一見，應對稱旨，自是屢承顧問。及海雲南還，公遂見留居，數年錄事。公卒，訃音至，公懇求奔喪，上賜之黃金百兩，仍遣使送。

邢州公持服營葬事起墳於賈村葬其祖父母父母服闋被召復還和林公獻書陳時事所宜者數十條凡萬餘言率皆尊主庇民之事上嘉納之甲寅歲從上征雲南己未歲從上伐宋由楊羅渡濟江圍鄂州上神武英斷每臨戰陣前無堅敵而中心仁愛公常贊之以天地好生為德佛氏以慈悲濟物為心方便救護所全活者不可勝計庚申歲春上正位宸極創定朝儀立官制改元建號一切所當施設時物之宜皆公所草定中統五年秋八月改至元元元年翰林學士承旨王鶚奏言書記劉秉忠效忠藩邸積有歲年叅幃幄之密謀定社稷之大計忠勤勞績宜被褒榮今聖

明御極萬物惟新秉忠猶以野服散號蕭條閑寂守其初心深所未安宜與正其衣冠崇以顯秩實遂衆望上覽奏欣然嘉納即日命有司備禮冊授公光祿大夫位太保叅領中書事選聘侍講學士竇默次女為夫人賜第於奉先坊給少府宮籍監戶人口甚衆公齋居蔬食終日澹然與平昔略不少異至元十一年扈從至上都居南屏之精舍秋八月壬戌之夜儼然端坐無疾而薨享年五十有九訃聞上嗟悼不已謂羣臣曰秉忠事朕三十餘年小心慎密不避險難事有可否言無隱情又其陰陽術數占事知來若合符契惟朕知之他人莫得與聞也遣禮部侍郎趙秉溫護其喪還大都以冬

十月壬申葬大都西南二十里崇福鄉之原棺斂營葬一切所須皆出內帑十二年春正月詔贈太傅儀同三司下太常議謚曰文貞仍命翰林學士王磐定謚碑石文字臣磐欽惟國家列聖相承咸以武功戡定禍亂龍韜豹畧鷹揚虎視豐功偉績之臣其當紀名汗簡畫像凌烟者不為不多若夫輔佐聖天子開文明之治立太平之基光守成之業者實惟太傅劉公為稱首聖天子方在潛邸士之所以涉遠道冒風霜而至者往往有所陳訴祈請干慕進用惟公獨無所求閑燕之際每承顧問輒推薦南州人物可備器使者宜見錄用由是弓旌之所招蒲輪之所起耆儒碩德奇才異能之士茅拔茹連至無虛月逮今三十年間揚歷朝省班布郡縣贊維新之化成治安之功者皆公平昔推薦之餘也其識度之宏遠推此一節而論亦可見其髣髴矣又自幼好學至老不衰通曉音律精筭數善仰觀占候六壬遁甲易經象數邵氏皇極之書靡不周知初丁太夫人憂毀瘠骨立衣一幣裘三歲不易及錄事公卒雖身從天竺之教而服食貶損容貌哀戚與循禮典而執通喪者蓋無少異也晚娶無子以猶子蘭璋為嗣弟秉恕今為順天路總管臣磐謹按中書左丞張文謙所作行狀次第其行事實而系以銘辭銘曰

大元五葉 聖運隆昌 爰有異人 出佐時康

|      |      |      |      |
|------|------|------|------|
| 不坐官府 | 不趨朝行 | 褐衣蔬食 | 禪寂徜徉 |
| 謀謨惟惓 | 罄竭忠良 | 指陳成敗 | 開闔陰陽 |
| 淵慮規畫 | 鬼神莫量 | 扶日上天 | 照臨萬方 |
| 萬方仰德 | 百靈效祥 | 庭陳玉帛 | 路走梯航 |
| 朝儀整肅 | 濟濟踳踳 | 群賢來集 | 庶政允臧 |
| 大綱一舉 | 衆目畢張 | 治定功成 | 聖眷彌彰 |
| 崇資峻秩 | 即表侯王 | 肇造皇家 | 元勳是當 |
| 良平佐漢 | 房杜興唐 | 公不自多 | 愈隆謙光 |
| 見善必舉 | 有能必揚 | 陸行滯阻 | 與為橋梁 |
| 川濟艱危 | 與為帆槳 | 寒而求衣 | 煥之裘裳 |
| 饑而求食 | 飯之腴肪 | 門庭桃李 | 爛熳芬芳 |
| 人感公德 | 銘刻肝腸 | 公施於人 | 過即道忘 |
| 公之仁賢 | 宜享遐年 | 胡為一朝 | 蟬蛻而仙 |
| 燕都南原 | 盧溝北啜 | 佳城鬱鬱 | 有墳歸然 |
| 地錮重泉 | 松柏參天 | 石爛松枯 | 芳名永全 |

墓誌銘

故光祿大夫太保劉公墓誌

翰林侍講學士少中大夫知制誥同修國史徒單公履謨

公姓劉氏諱侃更名秉忠仲晦其字也號曰藏春世居瑞州之劉李村其先仕遼多貴顯經亂譜謀散亡不能者據獨公之曾祖金初以世族累遷邢州節度副使秩

滿愛其風上因而家焉繼下母憂還瑞州留一子二女  
長適邢臺李氏次適陳氏子名澤即公之祖父也為人  
個尙有志節鄉里多愛重之娶張氏生男名濶公之父  
也幼通音律性慈祥居家接物之際終日無忤色號稱  
長者庚辰歲天兵南下邢遂舉郡降大師國王喜之聽  
立都元帥府衆推公為副都統尋陞都統事稍定改署  
本郡錄事為政寬而不苛民有爭訟者必以理論之人  
皆服其忠恕相讓而罷蓋庶幾古之不忍欺者時草昧  
之際未有定制州長數易無常每易則各樹親黨以代  
其先至者公獨不為所忌累任鉅鹿內丘提領所至皆  
有遺愛年甫六旬以老得告二子曰秉忠即公也次日  
秉恕公天資穎悟卓犖不凡兒時與群兒戲皆推以為  
長發蹤指使莫不奔走服事無有違者識者竒之母馬  
氏治家有法簡而不嚴教子踵三遷之訓尤不為姑息  
鄉人稱賢焉公八歲入學日誦數百言甫十二為質於  
元帥府元帥一見謂同僚曰此兒甚貴他日不可量也  
命師教以文藝不使隸質子班公遂致力於學道藝日  
進同輩莫能及年十七節使趙公以為才引置幕下丙  
申歲丁母憂毀瘠骨立恒衣一綿裘晝夜不解帶三年  
人以為難能公優為之可謂盡子道矣戊戌春公忽有  
所感謂人曰人生有限世事寧有極耶吾其息乎乃遁  
居武安之清化作文數篇以寓意又遷滴水澗雖蔬食



飲水裕如也天寧虛照老師聞之竒其行高而節苦遣弟子顏仲復輩以禮諭公遂備弟子禮是歲秋大蝗師遂挈公就熟雲中己亥歲大熟師乃還邢公因留住南堂講習天文陰陽三式諸書時海雲大士赴上召一見即携公偕行既至上以公博學多能遂留之自是禮日隆暇中讀四書窮易道講明聖人心學之妙無不該貫丙午冬其父錄事公卒哀至公乞奔喪上許之贈以黃金百兩既至邢依通禮服斬衰不以出世故而虧世法也父子之倫正矣明年冬十月葬祖及父於邢臺之賈村禮也戊申十二月上遣使召公還乃上策萬餘言正朝廷振紀綱選相任賢安民固本若是者教十條上曰誠如汝言天下可不勞而治公曰臣所言不敢不忠惟聖上從之與否耳既而復言於上曰今天下因弊邢為尤甚郡數乞官以治儻從其請邢民受賜多矣上遣本朝宿望之臣同劉肅才卿李簡子敬行專以存恤為務舊邢之版籍戶不過二千月餘流民歸者二萬邢遂大治甲寅秋從上征雲南首以神武不殺為請以故所全活者甚衆公決機制勝多與上合雲南之平此固廟謨英識筭無遺策亦公贊成之力也己未秋六軍渡江以雲南之所請者復於上民皆壺箪以迎莫不有後後來蘇之望以全聖上好生惡殺之德者類如此庚申春上正位宸極命公

議立中書省分一路宣撫司內而藩邸舊臣外而草茅遺逸皆得進用故官無曠員時無滯才於是除煩苛定官制頒俸秩輕徭薄賦制禮作樂聲明文物粲然一新號稱盛時焉五年八月改中統為至元 詔公以光祿大夫進位太保叅領中書省事更令名公既大拜以天下之重為己任以身徇國知無不為奏建國號定都邑頒章服立朝儀事無巨細有關於 國家大體者枚舉而縷陳之無有遺者十一年夏齋居於上都南屏之靜舍秋八月壬戌夜謂侍者曰汝輩皆退不召且勿來也長歌至雞鳴乃止遲明侍者入見其端坐不動即之乃瞑目輟息始知其已薨矣莫不大駭蓋其平日洗心無

累故其歸也安所以長歌者其猶古之所謂翫世者乎享年五十有九猶子蘭璋為嗣 上遣禮部侍郎知侍儀司事兼秘書少監趙秉溫擇以十月晦日葬於大都西南之崇福原凡所營葬之資一出於特恩也弟秉恕累任禮部侍郎順德安撫使彰德懷孟淄萊順天路總管皆著能聲其母張氏性勤儉內助謹嚴視公猶所生公之夫人竇氏乃今翰林侍講學士竇默之女七年庚午 詔遣禮部侍郎趙秉溫禮擇而配者焉夫人賢而且文御僕妾有恩內外宜之公之勲勞卓然著於世者固不可掩也論藝業字畫楷書雖多惟以魯公筆法為正草書又獨取二王以為專門之學餘則不暇論也其

用心之正可見矣探邵氏皇極之奧者正前代積差之  
曆法得琴阮徽外之遺音槩乎天文星緯卜筮算數皆  
有成書詩章樂府又皆膾炙人口其多能又如此至於  
嘉言正論達之於啓沃之際者未能盡錄俟後之紀于  
神道云銘曰繫公之初稟元精氣奪玄化生而靈始從  
大覺正法乘萬緣一掃鴻毛輕超然遠引拋塵纓成已  
成物乃自成聖哲有訓垂丁寧晨門荷蓀真狂生絕世  
而往恐未能歸來讀書志益凝旁達技數搜玄冥學通  
溥洽昭皇明提封所暨窮四溟面內不啻葵心傾公  
時佐命居保衡斟酌時措恢邦經天官上宰董六卿百  
師度尹咸師承一時憲度明章程叔孫綿蕤鏘珮珩宮  
懸九奏何鏗鉤曠時墜典今儀刑鋪張若是誰倚憑拔  
擢俊秀推髦英子飛振鷺來充庭謀王斷國裨益弘事  
在宸慮人無稱功成不居寧智名天聰一日音訃聆尚  
冀假寐聊遐征神遊不返恠聖情始終寵賻全哀榮天  
不憖遺一鑑零九原可作瞻模形麒麟有像傳丹青燕  
山西來瀘水縈墳科馬鬣幽泉窟岸深為谷谷乃陵榮  
公不朽存吾銘

祭文

維至元十一年九月甲戌朔八日辛巳昭文館大學士  
姚樞致祭于太保劉公亡友之靈嗚呼昔在恒山我車

于憇公來惠然若交一臂 王邨再逢始見淵懿六籍  
四書潛心內嗜釋子之衣孔門之嗣吾道斯文網維不  
墜格 君之心匪政匪事引 君之道曰仁曰義國其  
立民惟賢乃又兵則神武不殺為至輯集一書累踰萬  
字陳於 王前若合符契試政邢臺翕爾成治陝右河  
南化行尤亟雲南逆命邦人罔累漢鄂折衝兵無暴肆  
萬國懽心咸薦之 帝帝曰嘉哉汝其所自元勲不居  
孤卿無位身入靜深學窮幽邃曆數之原元會運世所  
以盈虛矢口坐致積養有素時行未既俄聞訃音脫然  
蟬蛻不疾而終誠足以異斯焉取斯係乎前志莫不我  
偕身親目視及物功多鬼神報施過此以還未知所謂

天皇歸賻 母后主瘞諸相庶官半由門庇感芳孔  
悲潛焉出涕人世哀榮鮮克有儷六十之年不為蚤逝  
後莫大焉猶予以繼遺恨毫釐衆所弗置諸生在門一  
語不遺嗚呼哀哉我思或存公往如棄魂其來方以承  
禴祭尚饗

又

維至元十一年歲次甲戌冬十二月望日翰林侍講學  
士吏部尚書博州路總管徐世隆謹以清酌庶羞之奠  
致祭于太保劉公之靈嗚呼 天興大元六十餘年王  
氣所鍾有開必先 聖不獨出衆賢從之聖賢相逢千  
載一時岩岩劉公首出襄國學際天人道冠儒釋初冠

章甫潛心孔氏又學葆真復參臨濟其藏無盡其境無  
涯鑿開三室混為一家逆知天命早識龍顏情好日  
密話必夜闌如魚得水如虎在山易地諸葛彌天道安  
道人其形宰相其心誰其似之黑衣惠琳數精皇極禍  
福能決誰其似之邵君康節詩詠高逸方外神遊誰其  
似之碧雲湯休字畫清勁筆中法具誰其似之黃山文  
孺扈從王師柔服哀牢公於是時蜀之韋臯堂上出  
竒鄂江飛渡公於是時晉之杜預天王既尊山人自晦  
公於是時唐之李泌相宅卜宮兩都並雄公於是時周  
之召公中統建元宣撫十道多舉名儒視草其詔至  
元入省命贊萬機暫決大議力辭以歸上亦知公  
不屑細務止解中書仍居保傅官制未定圖具列之朝  
儀未肅公奏聞之方期弘化儀刑萬方天遽奪之今也  
則亡生平少疾遲明歌唱開戶視之掩書長往天子震  
悼朝臣涕洟下至行路靡不哀思國事有疑誰與稽之  
民歲有災誰與禳之僚友有咎誰與救之人之老成寧  
復見之曩過趙郡有三大士曰蕭曰劉器量包世迹混  
佛老心同孔周仁雨義風欲洒九州蕭已仙蛻獨遺藏  
春栽培桃李徧滿君門身為師賓門多鄉相榮被殊遇  
得獲大葬公既無憾我獨何悲第愧老謬嘗辱公知我  
愛文辭許我典故視事翰林持衡文部公非私舉我豈  
懷恩言念如舊徃哭其墳南州孺子生葛一束奠章寫

心老淚盈掬嗚呼哀哉尚饗

劉太傅藏春集卷第六

劉太傅藏春集後序

文章之精者為詩其作始之由闢繫之重累變之端昔人述之備矣大抵得之有二一出於才一成於學必至天成妙悟千轉萬化而弗違理道之為貴也元太傅劉文貞公秉忠以天挺人豪之才統一貫萬之學出鬼入神之術空世離俗之識際遇世祖於王邸教其收攬中夏之雄才碩學征南詔下襄漢聿承寶位奄有四海所施甚異及蒙恩大拜正其倫紀又為之卜都邑定朝儀使網舉目張文物一新隱然太平氣象厥功烈哉尚論其恩過隆渥言聽計從類宋惠琳豐功偉蹟始終一致類唐李泌而和順積中英華秀發雖吟風弄月之詞道

情寫景之作吐嗟戲嘯之音皆清新壯麗灑落渾脫如  
風如影不可窺擬而一歸于禮義豈其才以學濟詩從  
禪悟道臻太極妙際真空恍惚有無超越萬化故能無  
可不可無為不成歟處州守馬侯生近公鄉慨公功名  
事業播傳已久而詩文之美世或未聞乃彙而輯之刻  
梓廣傳俾敘諸元翰林學士閣公復後感心也夫人之  
為人貴乎立德其次立功立言弗能兼也若公者可謂  
有德有功且有言也歟然公生平謀謨之辭治安之策  
述事載道垂世立教之文當不止是同志君子毋視以  
為公之餘事采而補之庶無遺憾也公雖世顯于邢實  
吾瑞劉李村人蓋一村兩姓唐宋以來世為婚姻如徐  
之朱陳耳世澤之萃于公者遠哉

大明天順五年辛巳冬十月既望河南南陽府泌陽縣  
吏臨川黎近久大書